

1 CORINTIOS

Corinto marcacho tag yäracog mayincunaman apóstol Pablo punta cag cartata apatsishgan

Corinto marcaga Grecia nacioncho caycag Acaya provinciachömi cargan. Corintoga jatuncaray marcami cargan. Manarag apóstol Pablo Corinto marcaman chayap-tin manami pipis tsaycho musyarganragtsu Jesucristupa ali wilacuyninta. Tsayman chayaycur Pablo wilacuptinmi itsanga Jesucristuta waquin runacuna chasquicärer-gan. Tsaychömi Pablo targan juc wata sogta quilla Jesucristupa wilacuyninta chas-quicogcunata yachatsishpan. Corintucho Pablo caycaptin ima pasashgancunata masta musyanayquipag liyinqui Hechos 18.1–17.

Jesucristuta chasquicushga caycarpis apóstol Pablo aywacuptin Corintucho cag waugui-panicuna manami Diosnintsi munashgannogtsu cawargan. Tsaymi quiquin-pura chiquinacärergan (1.10–17; 3.1–4), yachag-tucärergan (3.18–23), Pabluta jamurpargan (4.1–21), jutsa rurag wauguita chasquipargan (5.1–13), autoridäcunaman jucninpis juc-ninpis quejanacärergan (6.1–11) y majanwan punuytapis mana munapäcorgannatsu (7.1–7). Tsaynogmi idulucunapa jutincho pishtashgan aytsata micapäcorgan (8.1–13; 10.14–11.1) y apóstol caycaptinpis Pabluta manacagman churapäcorgan (9.1–27). Tsaynoglamı warmicunapis runanta mana respitapäcorgantsu (11.2–16), Santa Cënata-pis jutsata rurashga caycarmi upupäcorgan (11.17–34), Santu Espiritu imanog yana-pashgantapis manami tantyapäcorgantsu (12.1–31), imanog cuyanacunanpag cashgan-tapis manami tantyapäcorgantsu (13.1–13) y runa mana tantyashgan idiömapa Diospa wilacuyninta yachatsipäcorgan (14.1–40). Tsaynogpis wanushganpita cawarimunapag cashganta manami criyipäcorgantsu (15.1–58).

Tsaynog cawapäcuptinmi paycunaman cay cartata apóstol Pablo apatsergan shu-mag tantyacärinanpag. Tsaynogpis Jesucristupa wilacuyninta runacuna manacagman churaptinmi paycunata Pablo tantyatsergan ali wilacuyninta chasquicogcunata Tayta Dios salvananpag cashganta (1.18–2.16). Tsaynogpis yachatsergan majayog canan-pag o majaynag cananpag cashganpıtapis (7.8–40) y ofrendata shuntananpag cash-ganpıtapis (16.1–4).

Carta galaycunan

1 ¹ Corinto marcacho caycag yära-cog mayëcuna:

Jesucristupa apostolnin canäpag Tayta Diosnintsi acramashga cap-tinmi noga Pablo wauguintsi Söste-neswan cay cartata gamcunapag apaycäsimö. ² Gamcunatapis Tayta

Diosnintsimi acrashushcanqui paypa maquincho car cuyashgan wamran-cuna canayquipag. Tsaynog acrashu-nayquipäga Jesucristumi cruzcho wanushpan perdonashushcanqui lapan jutsata rurashgayquicunata. Tsaynoglamı may-tsaychöpıs payta chasquicogcunataga perdonaycan. ³ Tayta Diosnintsi

Jesucristutami manacuycă cuyapăshushpayqui ali cawayta goyculăshunayquipag.

**Jesucristuta chasquicogcunata
Tayta Dios yanapashgan**

⁴ Jesucristuta chasquicushgayquipitami Tayta Diosnintsi imaypis yanapaycăshunqui. Tsaymi gamcunapag Tayta Diosnintsita imaypis agradecicur manacö. ⁵ Tsaynog yanapashuptiquimi ali wilacuynta tantyacur juctapis wilaparcaycanqui. ⁶ Tsaymi tantyarcaycanqui Jesucristupa wilacuynin rasunpa cashganta.

⁷ Tayta Diosnintsi tsaynog yanapashushpayquimi tucuy habilidăcunata goshushcanqui hasta Jesucristo cutimunanayag pay munashgannog cawapăcunayquipag. ⁸ Tsaymi Jesucristo cutimushpan tarishunquipag jutsata mana ruraypa pay munashgannog cawarcaycagta. ⁹ Pay munashgannog cawanayquipagmi Tayta Diosnintsi promitishgannogla imaypis yanapaycăshunqui. Paymi naupapita-patsa acrapăcushushcanqui tsurin Jesucristupa maquincho cawanayquipag.

**Waugui-panicuna mana
chiquinacunanpag yachatsicuy**

¹⁰ Waugui-panicuna, Jesucristupa jutinchömi gamcunata ruwacö mana chiquinacunayquipag. Jesucristuta chasquicushgana caycarga juc shongula cuyanacur cawapăcuy.

¹¹ Panintsi Cloé casta shamurmi wilmashga gamcuna chiquinacur rimanacur cawarcaycashgayquita. ¹² Waquinniquishi nircaycanqui noga yachatsishgăcuna más ali cashganta. Waquinniquinashi nircaycanqui Apolos^a yachatsishgan más ali cashganta

o Pedro yachatsishgan más ali cashganta. Waquinniquinashi tsaynog negcunapita witicur yachag-tucurcaycanqui: “Nogacunaga Jesucristupa wilacuynta masmi yachă” nishpayqui.

¹³ Waugui-panicuna, tsaynog yarparga lutantami yarparcaycanqui. Jesucristoga juclaylami; manami atscaman raquicashgatsu caycan. Tsaynogpis manami nogacunatsu gamcuna-raycu cruzcho wanushcă. Tsaynogpis manami nogacunapa jutăchötsu bautizacărishcanqui. ¹⁴⁻¹⁶ Gamcuna cagcho car Crisputa y Gayulatami bautizashcă. Tsaynogpis Estėfanas castalataimi bautizashcă. Tsaypita cagtaga manami pitapis bautizashcătsu. Gamcuna cagcho atscagta mana bautizashgăpitami cushicö. Atscagta bautizap-tăga capaschari más chiquinacunquimanpis cargan: “Pablo bautizamashganga masmi vălin” nishpayqui. ¹⁷ Manami runacunata bautizar purinăpagtsu Jesucristo nogata cachamashga, sinöga ali wilacuynta wilacur purinăpagmi. Tsay ali wilacuyta wilacorga manami yachag cashgăta runacuna yarpapăcunanpagtsu wilacö, sinöga Jesucristuta chasquicunanpagmi. Yachag-tucur wilacuptăga runacuna Jesucristuta chasquicunanpa trucanga nogalatanami alabamanman cargan. Runacuna alabamănanpag wilacorga Jesucristo runacuna-raycu cruzcho wanushgantami manacagman churăman cargan.

**Jesucristupa wilacuynta manacagman
churaptinpis chasquicogcunata
salvananpag cashgan**

¹⁸ Jesucristuta mana chasquicushganpita infiernuman gaycushga

^a 1.12 Apolos pı cashganta musyanayquipag liyinqi Hechos 18.24–28.

cananpag cagcunaga yarpapäcun manacaglapag Jesucristo cruzcho wanushganta. Nogantsimi itsanga tantyantsi cruzcho wanushgan salvacunantsipag cashganta. ¹⁹ Tsaynog captinmi Tayta Diosninti cumpliycan palabrancho escribiraycashgannogla. Tsay escribiraycashganga caynogmi niycan:

“Yachag runacunapa yarpaynin-cunatapis manacagmanmi churashag.

Yachag caynilanwanga manami imanogpapis salvacongatsu.”^b

²⁰ Tsaynog niycaptenga mayjina yachag carpis Jesucristupa wilacuy-ninta mana chasquicorga manami pipis salvacongatsu. ²¹ Tsaymi manacaglapag wilacushgäta yarpapäcup-tinpi tsay wilacushgäta chasquicog-cunataga Tayta Diosninti salvaycan.

²² Jesucristupa wilacuyinin rasunpa cashganta musyananpäga Israel runacuna milagrucunataragmi ricayta munapäcun. Mana Israel runacuna-nami munapäcun yachatsicognincuna yachatsishgannograg nogacunapis yachatsinäta. ²³ Tsaynog munapäcup-tinpi manami mana Israel runacuna munashgannogtsu yachatsipäcö, ni Israel runacuna munashgannogtsu milagrucunata rurapäcö. Tsaypa truncanca Jesucristo nogantsi-raycu cruzcho wanushgantami wilacärë. Tsayta wilacur puripäcup-tëmi Israel runacuna rabiashpan caynog nircaycan: “Diospa tsurin caycarga manami cruzcho wanunmantsu cargan.” Mana Israel runacunanami yarpapäcun manacagcunata yachatsishgäta. ²⁴ Tayta Diosninti acrashgan cagcunami itsanga Israel runacuna carpis y mana Israel runacuna carpis wilacushgäta

cushishga chasquicärin. Paycunaga tantyacärin Jesucristuta chasquicuptin Tayta Diosninti salvananpag cashgantami. ²⁵ Tsaymi wilacushgä mana yachag runacunalapag cashganta yarpapäcup-tinpi tsay wilacuyta chasquicogcunataga Tayta Diosninti jutsancunata perdonaycan. Tsaynogpis Jesucristo cruzcho wanushganta runacuna manacagman churaptinpi wilacuy-ninta chasquicogcunataga Tayta Diosninti perdonaycanmi.

Yachag cashgalanpita ni munayniyog cashgalanpitaga pipis mana salvacunanpag yachatsicuy

^{26,27} Waugui-panicuna, aläpa mana yachag, ni munayniyog, ni ricu cashgayquipita runacuna manacagman churashuptiquipis gamcunataga Tayta Diosnintsimi acrashushcanqui salvashga canayquipag. Tsaynog-pami juicio final junag salvashga caycagta ricashushpayqui tsay manacagman churashogniqui pengacären-gapag. ²⁸ Tsay junagmi tantyapä-conga yachag cashganpita ni munayniyog cashganpita pipis mana salvacunanpag cashganta. ²⁹ Tsaynog captenga Tayta Diospa naupancho manami pipis alabaconganatsu: “Yachag cashgäpitami nogataga salvamashga” nishpan.

³⁰ Nogantsega manami yachag cashgantsipitatsu salvacushcantsi, sinöga Jesucristo nogantsi-raycu cruzcho wanushganpitami. Tsaynogpami jutsa rurashgantsita perdonamashpanti jutsaynagtana Tayta Dios chasquimantsi. Nircurnami munayninman churamashcantsi pay munashgannogna cawanantsipag.

³¹ Tayta Diosnintisipa palabranhöpis

^b 1.19 Isaías 29.14.

caynogmi niycan: “Pipis alabacunanpa trucanga Tayta Diosta alabatsun.”

**Tayta Diosnintsi yarpashgancunata
Santu Espiritu tanyatsishgan**

2¹ Waugui-panicuna, gamcuna cachgo car manami yachag cashgäta yarpar alabapäcamänayquipagtsu ni sasa tanyay palabracunawantsu Jesucristupa wilacuyninta yachatsishcä. ² Nogaga gamcunata yachatsishcä Jesucristo salvacog cashganta y nogantsi-raycu cruzcho wanushgalantami. ³ Tsaynog yachatsirpis laquicushcä shumag mana tanyanayquipag cashganta yarparmi. ⁴ Tsaymi Santu Espiritu yanapamaptin mana tumatsipaylapa gamcunata Jesucristupa wilacuyninta wilapargä. ⁵ Tsaynog captenga manami quiquëpa yarpayñëpita tanyatsishgäpitatsu wilacushgäta chasquicärishcanqui, sinöga Santu Espiritu tanyatsishup-tiquimi.

⁶ Manacagcunalata wilacushgäta waquin runacuna yarpaptinpis Jesucristuta chasquicogcunami itsanga tanyacurcaycan Diosnintsi munashgannog wilacushgä ali cashganta. Jesucristupa wilacuynenga manami yachag runacuna ni munayniyog runacuna yarpashgannogtsu caycan, sinöga quiquin Tayta Diosnintsi munashgannogmi. Tsay runacunaga munayniyog carpis cay patsacho ushacaglami carcaycan. ⁷ Yachag runacuna yarpashgannog mana captinpis Jesucristupa wilacuynenga imayyagpis gloriacho cawanantsipagmi caycan. Gloriaman pushamänantsipäga cay patsata manarag camarmi Tayta Diosnintsi yarpangan. ⁸ Cay patsacho mandagcunaga manami tanyapäcor-

gantsu Tayta Diosnintsi tsaynog yarpashgancunata. Israel runacunapa autoridänincuna tsayta tanyargamanami Jesucristuta cruzcho wanutsinanpag Roma autoridäcunaman entregamantsu cargan.

⁹ Tayta Diosnintsi palabanchöpis caynogmi escribiraycan:

“Pipis mana ricashganta
ni mana mayashganta
ni mana yarpashgantami
payta cuyagcunapag Tayta Diosnintsi camarishga.”^c

^{10,11} Tsay camarishgantaga Santu Espirituwanmi Tayta Diosnintsi musyatsimashcantsi. Runa imata yarpashgantapis shongulan musyashgannogmi Santu Espiritupis Tayta Diosnintsi imata yarpashgantapis musyaycan. ¹² Tsaynogpis Santu Espirituta chasquicurmi tanyantsi Tayta Diosnintsi cuyapämashpanti salvamashgantsita. Santu Espirituta manarag chasquicorga manami tanyargantsitsu salvación cashganta.

¹³ Gamcunata tsaynog wilapaycä manami quiquëpa yarpayniläpitatsu, sinöga Santu Espiritu tanyatsimashgannogmi. ¹⁴ Santu Espirituta mana chasquicogcunaga manami tanyantsu imanir Jesucristupa wilacuyninta runacuna chasquicushgantapis. Paycuna yarpapäcun manacaglapag runacuna chasquicärishgantami. ¹⁵ Santu Espirituta chasquicogcunami itsanga tanyapäcun Jesucristupa wilacuyninta salvacunapag cashganta. ¹⁶ Jesucristupa wilacuynin manacagpag cashganta yarpag runacunapagmi Tayta Diosnintsi palabanchöpis caynog escribiraycan:

“Manami pipis Tayta Diosnintsi yarpashgancunata tanyantsu.

^c 2.9 Isaías 64.4.

Manami pipis payta yachatsinapag yachag cantsu.”^d Tsay escribiraycashgannoglami paycuna mana tanyapäcuntsu Jesucristupa wilacuyñinta chasquicur salvacärinapag cashganta. Nogantsimi itsanga tanyantsi Jesucristupa wilacuyñinta chasquicur salvacunantsipag cashganta. Tsayta tanyantsi Jesucristo yarpashgannog yarparmi.

**Waugui-panicuna
rimanacur chiquinacur
mana cawanapag yachatsicuy**

3¹ Waugui-panicuna, tsaynog captinpis gamcunaga carcaycanqui pishi wamranog mana tanyacoglagrami. Santu Espiritu munashgannog cawanayquipag cashganta manarag tanyaptiquimi gamcuna cagcho caycar tsayrag yachacuyecag wamracunatanogpis yaparir yaparir tsaylata yachatsishcä. ² Iti wamrata micuyta manarag micuptin chuchulawan maman ashmashgannogmi nogapis gamcunata galaycunan cag yachatsicuycunatarag yachatsishcä. Cananyagpis mana tanyacog carmi pishi wamranoglarag carcaycanqui. ³ ¿Imanirtag tsaynog carcaycanqui? Noga mayashcä gamcuna chiquinacur rimanacur cawarcaycashgayquitami. Tsaynog cawarga Jesucristuta mana chasquicog runacunanoglami cawarcaycanqui. ⁴ Waquinniquega: “Pablo yachatsishgantami chasquicö” y waquinniquega: “Apolos yachatsishgantami chasquicö” nishpayqui chiquinacurcaycanquimi. Tsaynog chiquinacorga Jesucristuta mana chasquicog runacunanoglami cawarcaycanqui.

⁵ Tsaynog ninayquipäga ¿pitag cä noga? Tsaynogpis ¿pitag Apolusga? Nogacunaga Tayta Diosnintsipa wilacognilami carcaycä. Paypa wilacuyñinta wilacäriptëga manami nogacunatatsu chasquipäcamashcanqui, sinöga Jesucristutami. ⁶ Muruta murog runa murushgannogmi gamcunata wilapashcä Jesucristuta chasquicärinayquipag. Apolusnami juc runa murushganta pargognogpis Jesucristupa wilacuyñinta mastana tanyatsishushcanqui. Murushgantsita winatsimushgannogpis Tayta Diosnintsimi gamcunata shumag tanyatsishushcanqui Jesucristuman yäracärinayquipag. ⁷ Manami nogantsitsu murushgantsita winatsimuntsi, sinöga Tayta Diosnintsimi winatsimun. Tsaynoglami wilacushgäta chasquicur yachacunayquipäga nogatsu ni Apolustus munayniyog carcaycä, sinöga Tayta Diosnintsimi.

⁸ Murog caggpis pargog caggpis chacra ali wayunanpag arushgannogmi nogapis Apoluspis Tayta Dios munashgannog cawapäcunayquipag yachaycätsë. Chacracho arogcuna arushganpita päguta chasquishgannogmi nogapis y Apoluspis gloria-man chayashpä chasquinäpag cagta chasquishagpag. ⁹ Nogacunaga mincaynoglami Tayta Diospa wilacognin carcaycä. Gamcunanami Tayta Dios arucätsishgan chacrano g carcaycanqui.

**Jesucristuta chasquicogcuna
Tayta Diosnintsi sharcaycätsishgan
wayinog cashganpita yachatsishgan**

Tsaynogpis gamcunaga carcaycanqui Tayta Dios sharcaycätsishgan wayinogmi. ^{10,11} Jesucristunami

^d 2.16 Isaías 40.13.

wayipa cimientunnog caycan. Apóstol car paypa wilacuyninta wilacurmi nogapis wayipa cimientunta sharcatssegnog caycä. Gamcunatanami Tayta Diosnintsi yanapaycäshunqui tsay cimientu jananchu wayita sharcatsseg albañilnog canayquipag.¹² Jesucristo munashgannog ali cawashpayquega öruwanpis guellaywanpis o cuyaylapag chip-chipaycag rumicunawanpis wayita sharcatssegnogmi carcaycanqui. Jesucristuta chasquicushga carpis lapan shonguyquiwan pay munashgannog mana cawashpayquimi itsanga gueruwan, ogshawan, o rämacunawanpis wayita sharcatssegnog carcaycanqui.

¹³ Imanogpis cawashgantsipitami juicio final junag Jesucristo juzgamäshunpag. Tsay junag juzgamashpantsega lapan rurashgantsicunata ninawanmi camarcongapag.¹⁴ Öruwanpis guellaywanpis o cuyaylapag rumicunawanpis sharcatsishga wayinog rurashgantsicuna captenga tsay nina manami ushangatsu. Tsaymi gloriacho premiuta chasquishunpag.¹⁵ Gueruwan, ogshawan, o rämacunawanpis sharcatsishga wayinog rurashgantsicuna captinmi itsanga nina rupar ushangapag. Tsaymi gloriaman chayar ima premiutapis mana chasquishunpagtsu. Tsaynog captinmi wayita nina rupartin runa imaycanogpa gueshpír salvacushgannog nogantsipis apénas salvacushunpag.

¹⁶ ¿Manacu musyapäcunqui Tayta Diosnintsi täcunan templun carcaycashgayquita? Tsaynogpis ¿manacu musyapäcunqui Santu Espírítu gamcunacho taycashganta? ¹⁷ Tsaymi Jesucristuta chasquicog mayiquita

manacagman churarga paycunacho caycag Santu Espiritutapis manacagman churarcaycanqui. Tayta Diosnintsi templun captenga payman yäracogcunata manami manacagman churashwantsu. Pitapis tsaynog rurag cagtaga Tayta Diosnintsi infernumanmi gaycongapag.

**Waugui-panicuna mana
yachag-tucunanpag tantyatsicuy**

¹⁸ Tsaynog caycaptenga shumag tantyacäriy mana yachag-tucog canayquipag. Yachag cashgayquiman atiënicunayquipa trucanga mana yachag-tucuylapa cawapäcuy. Tsaynog cawarmi tantyacärinquipag Tayta Diosnintsi munashgannog cawanayquipag.¹⁹ Yachag-tucog runacunata Tayta Diosnintsi manacagmanmi churangapag. Pala-branchöpis caynogmi escribiraycan:

“Tayta Diosnintsega yachag-tucogcunata manami cäsupangatsu.”^e

²⁰ Tsaynogpis caynogmi escribiraycan:

“Tayta Diosnintsi musyaycanmi yachag runacuna manacagcunata yarpaycashganta.”^f

²¹ Tsaynog niycaptenga runacuna yachag cashganman ama atiënicäriytsu.^{22,23} Tsaynog caycaptenga nogaman ni Apolusman ni Pedrumanpis ama atiënicärimaytsu. Gamcunatapis Jesucristumi salvashushcanqui. Tsaynogpis Jesucristoga Tayta Diosnintsiwanmi caycan. Mushog patsatapis chasquinquipagmi. Tsaynog caycaptenga cawarpis wanurpis ni ima pasashuptiquipis runaman yäracäriyayquipa trucanga Tayta Diosnintsi-man yäracäriy.

^e 3.19 Job 5.13. ^f 3.20 Salmo 94.11.

**Waugui-panicunata yachatsinanpag
apóstol Pablo munayniyog cashgan**

4 ¹ Tsaynog captenga nogapis, Pedrupis y Apoluspis Jesucristupa wilacognin cashgaläta tanyapäcuy. Nogacunaga manami atiënicäri-mänayquipagtsu wilacäre, sinöga Jesucristupa wilacuyninta chasquicur salvacärinayquipagmi. ² Wilacognin canäpag Señornintsi Jesucristo churamashga captinmi pay munashgannogla wilacuyä. ^{3,4} Tsaynog wilacurmi mana ali wilacog cashgäta yarpaptiquipis mana laquicötsu. Juicio final junagchöga manami gamcunatsu juzgamanquipag ali o mana ali wilacog cashgäta, sinöga Tayta Diosnintsimi.

⁵ Tsaynog caycaptenga Jesucristupa wilacognincunata ama jamurpaytsu. Señornintsi Jesucristo cutimurnami juzgangapag ali o mana ali wilacognin cashgantapis. Juzgamänantsi junagmi nimäshun pacaylapa jutsa rurashgantsicunata y shongulantsicho lutanta yarpashgantsitapis. Pay munashgannog cawashgantsitupumi Tayta Diosnintsi premiuta gomäshunpag.

⁶ Gamcunaga waquin waugui-panicunata shimita jatipaycanqui caynog nir: “Apolos yachatsishgan-cunata yachacunayquipag nogacunanaman shacamuy. Payga Pablupitapis masmi yachan.” Waugui-panicuna, Tayta Diosnintsi palabranta rasunpa cäsucorga manami tsaynog ninquimantsu. ⁷ Shimita tsaynog jatipänayquipäga ¿pitag shacyätsishushcanqui? ¿Pi cashgayquita yarpaptag gamcunaga waquin cagcunata manacagman churarcaycanqui? Tsaynogpis ¿imanirtag yarparcaycanqui yachag cashgayqui qui-

quilyayquipita cashganta? Rasunpa yachag carga tanyapäcunquimanmi Tayta Diosnintsi pitartag ima yachaytapis chasquishgayquita.

⁸ Tsaynog caycaptenga ¿imanirtag yarparcaycanqui aläpa yachag cashgayquita? Tsaynog carga ¿pi cashgayquitatag gamcuna yarparcaycanqui? Rey cashgayquita yarpap mana nachag cäsuycamanquinatsu, ¿au? Rasunpa rey captiquega nogacunapis mandäshëmanmi. ⁹ Tanyaynëchöga apostolcunata Tayta Diosnintsi churapäcamashga lapanpitapis más nacapäcunäpagmi. Lutanta rurag runatanogpis nogacunataga wanutsimaytami munapäcaman.

Tsaynog nacashgätaga lapan runacunapis angilcunapis ricaycämanmi.

¹⁰ Jesucristo salvamagnintsi cashganta wilacur puripäcuptë ¿imanirtag waquin runacuna upa cashgäta yarpashgannog gamcunapis yarparcaycanqui? Nacar puripäcuptë ¿imanirtag waquin runacuna munayniyog cashgäta yarpashgannog gamcunapis yarparcaycanqui? Achyä gamcunaga nogacunapitapis más ali ricashgachari carcaycanqui.

¹¹ Hasta cananyagpis nogacunaga nacapäcushcä micanar, yacunar, röpa lapsha captin gasätsicur. Tsaynogpis magar ushashga puripäcushcä. Wayëcunapis quiquëcunapaga manami cantsu. ¹² Nistashgäcunapag uticashgäyag quiquëcunaragmi arupäcö. Runacuna ashli-maptinpis nogacunaga upälacärëmi. Tsaynogpis Tayta Diosnintsi manacäre paycunata perdonanpag. Tsaynoglämi may-tsaycho chiquir gaticachämaptinpis mana jagayappa puripäcö. ¹³ Wasäta rimapäcuptinpis nogacunaga ali shimiläpami parlapä. Cananyagpis

nogacunataga mana väleg runatanogmi ricapăcaman. ¹⁴ Manami gamcunata pengayman churanăpagtsu tsaynog nir escribiycămö, sinöga shumag tantyacărinayquipagmi. Gamcunaga cuyay tsurėnogmi carcaycanqui.

¹⁵ Chunca waranga (10,000) yachatsishogniquicuna captinpis juclaylami puntata wilapăshushcanqui Jesucristuta chasquicunayquipag. Tsay wilapăshogniquega nogami caycă. Tsaynogpami gamcunapa taytayquinog caycă. ¹⁶ Tsaymi gamcunata yătsė noga cawashgănog gamcunapis Tayta Diosnintsi munashgannog cawanayquipag.

¹⁷ Gamcuna cagcho imanog cawashgătapis yarpătsishunayquipagmi Timoteuta gamcunaman cachamushag. Payga cuyay tsurėnogmi caycan. Tsaynogpis payga cawaycan Tayta Diosnintsi munashgannogmi. Tsaymi may-tsaychöpis yachatsishgănog gamcunatapis shumag yachatsipăcushunquipag.

¹⁸ Waquinniquega mana shamunăpag cagta yarpārshi pasaypa yachag-tucur contră sharcapăcushcanqui. ¹⁹ Tsaynog yarpaptiquipis Tayta Diosnintsi yanapamaptenga shamushagmi gamcunata watucunăpag. Tsaychōnami musyamanga tsay yachag-tucogcuna. ²⁰ Tayta Diospa maquincho cawayga manami yachag-tucur parlaytsu, sinöga pay munashganta rurar cawaymi. ²¹ Gamcuna cagman shamur manami pitapis olgōpayta munătsu. Mana olgōpănăpăga lutan rurashgayquicunata cacharir ali cawapăcuy. Tsaynog cawaptiquimi gamcuna cagman shamur cushicushagpag. ¿Rabiashga chămunătacu o cushishga chămunătacu gamcunaga munarcaycanqui?

**Madrastanwan punog runata
waugui-panicuna manana
chasquipănanpag Pablo nishgan**

5 ¹ Musyashcă gamcunacho juc runa madrastanwan taycashgantami. Tsaynog rurashganga pasaypa pengacuypag jutsami caycan. Jesucristuta mana chasquicog runacunapis tsaynog jutsa rurag runataga pasaypami jamurpan. ² Tsaynog caycaptenga ¿imanirtag gamcunaga tsay runata chasquipaycanqui? ¿Imanirtag yarpārcaycanqui tsay runata chasquipănayquita Tayta Diosnintsi munashganta? Tsay runata chasquipănayquipa trucanga ¿imanirtag mana pengacărinquitsu? Tsaynogpis tsay-nirag runataga ¿imanirtag juntacashgayquipita mana gargunquitsu?

³ Gamcuna cagcho mana carpis maynami yarpachacushcă tsay runata manana chasquipănayquipag. ^{4,5} Cananga Señornintsi Jesucristupa jutincho juntacar tsay runata ninqui jutsa ruraycashganta mana cachariptenga paywan manana juntacănayquipag cashganta. Tsayta ninayquipag juntacaptiqui gamcunapag Tayta Diosnintsi manacuycăshagmi mana mantacuyapa payta tanyatsinayquipag. Tanyatsiptiquipis mana căsucuptenga paywan amana juntacaynatsu. Tsaynog runataga cachapariy Satanás munashganta rurananpag. Tsaynog car fiyupa nacashpan capaschari tanyaycar jutsa rurashganta cacharinmanpis. Tsaynogpami perdonashgana captin Señornintsi Jesucristo cutimur gloriaman pushangapag.

⁶ Tsay runa alita ruraycashganta yarpār chasquiparga gamcuna manami Tayta Dios munashgannogtsu cawarcaycanqui. “Walca levadūra-

lami mäsata jacatsin” nipäcushgan-noglamı jutsayog runata jutsa rurash-ganta mana corrigerga gamcunapis jutsa rurayman churacanquipag.

⁷ Musyapäcushgayquinogpis Pascua aniversario galaycunanpag Israel runacuna levadürata wayincunapita jitarinmi. Gamcunapis tsaynogla tsay jutsa rurag runata gargapäcuy gamcunawan manana juntacänan-pag. Pascua aniversariucho carnishta Israel runacuna wanutsishgannogmi Jesucristupis nogantsi-raycu cruzcho wanushga jutsantsicunata cacharir Tayta Dios munashgannog cawanantsipag. ⁸ ⁸ Tsaynog caycaptenga jutsa ruraycunata cacharir Tayta Dios munashgannog cawapäcuy.

⁹ Naupa cag cartata apatsimushgä-chöpis maynami nishcä jutsa rurag runacunawan mana juntacänayquipag cashganta. ^{10,11} Manami lapan runacuna-pita witicunayquipagtsu tsaynog nishcä, sinöga Jesucristuta chasquicog-tucur jutsa rurag runacunawan mana juntacänayquipagmi. Jesucristuta chasquicushganta niycarpis paycunaga warmin warmin puricärin, imapagpis codiciöso capäcun, idulucunaman yäracur cawapäcun, runapa wasanta rimapäcun, upyacärin y suwacärinpis. Tsay-nirag runacunawan mana juntacänayquipagmi apatsimushgä cartachöpis gamcunata mayna tanyatsishcä. Paycunawanga micunayquipagpis ama juntacaytsu. Jesucristuta mana chasquicog runacunapita itsanga ama witicäriytsu. Cawaycashgantsiyäga imaypis paycunawan juntacaycäshunragmi.

^{12,13} Manami munayniyogtsu caycantsi Jesucristuta mana chasquicog

runacunata juzganantsipag. Paycunata quiquin Diosnintsimi juzgangapag. Jesucristuta chasquicog mayintsi jutsa rurayta mana cachariptinmi itsanga juzganantsipag y corriginantsipagpis munayniyog caycantsi. Tsaymi madrastranwan cacog runataga juntacashgayquiman ama chasquipaytsu.

Autoridäcunaman quejanacuy mana ali cashgan

6 ¹ Gamcuna imapitapis rimana-corga ¿imanirtag quejacog aywarcaycanqui autoridäcunaman? Tsaypa trucanga ¿imanirtag quiquiquipura mana arreglapäcunquitsu? ² ¿Manacu gamcuna musyanqui Jesucristuta mana chasquicog runacunata juzganantsipag Tayta Diosnintsı churamänantsipag cashganta? Tsaynog caycaptenga ¿imanirtag quiquiquipura mana arreglapäcunquitsu? ³ ¿Manacu musyapäcunqui angilcunatapis juzganantsipag cashganta? Tsaynog canantsipag caycaptenga ¿imanirtag mana arreglash-wantsu waugui-panicuna rimanacuptin? ⁴ Tsaynog caycaptenga maygan wauguiwan o paniwanpis rimana-curcur ama aywapäcuytsu Jesucristuta mana chasquicog autoridäcunamanga. ⁵ ¿Manacu gamcunacho pilapis can tsaynog rimanacuptiqui arreglashunayquipag? Quiquiquipura arreglanayquipa trucanga pengaypagmi autoridäcunaman gamcuna aywarcaycanqui quejacunayquipag. ⁶ Tsaynog rimanacorga mana alitami rurarcaycanqui. Nircurpis pengacunayquipa trucanga Jesucristuta mana chasquicog autoridämānrag aywarcaycanqui quejacunayquipag.

⁸ 5.7 Pascua aniversariucho carnishta wanutsishganpita musyanayquipag liyinqi Deuteronomio 16.1–8.

⁷ Autoridácunaman quejacur gänap-tiquipis Tayta Diosta mana cäsucog runacuna jamurpëshunquimi. Tsay-nog caycaptenga rabianätsishuptiqui-pis ¿imanirtag mana upälacunqui-tsu? Suwapëshuptiquipis ¿imanirtag: “¿Imanëshagtag? Jina apacutsunpis” ninquitsu? ⁸ Jesucristuta chasqui-cushgana caycarga ¿imanirtag gam-cuna rabianätsinacur suwapänacur cawarcaycanqui?

⁹ ¿Manacu gamcuna musyapäcun-qui jutsa rurag runacunaga Tayta Diospa naupanman mana chayanan-pag cashganta? Manami paypa nau-panman chayangatsu chinërucuna, waynan waynan puricogcuna, idulu-cunaman yäracogcuna, adulterio jutsata ruragcuna, olgupura warmi-wannog punucogcuna, ¹⁰ suwacogcu-na, codiciösucuna, upyagcuna, wasa-riacuna y saqueapacogcunapis. Manami mayanpis tsaynog jutsa ruragcunaga Diospa naupanman cha- yangatsu. ¹¹ Gamcunapis waquinni-quega naupata tsaynoglami jutsata rurar cawapäcorgayqui. Tsaynog caycaptiquimi Santu Espiritu tantya-tsishushcanqui Jesucristuta chasqui-cärinayquipag. Jesucristuta chasqui-cuptiquinami lapan jutsayquicunata Tayta Diosnintsi perdonashushcan-qui paypa maquinchöna cawanay-quipag.

**Püta warmicunaman mana
aywananpag tanyatsishgan**

¹² Gamcuna nircaycanqui munash-gayquita ruranayquipag librina cay-cashgayquita. Nishgayquinog captin-pis manami jutsata rurar cawapäcunayquipagtsu libri caycanqui, sinöga Tayta Diosnintsi munashgannog

cawapäcunayquipagmi. ¹³ Waquin runacuna caynog nipäcun: “Wanur pachantsita apacunantsipag caycap-tenga cawashgantsiyag micushun upushun.” Waugui-panicuna, runa-cuna tsaynog niptinpis nogantsega gloriacho cawanantsipagmi caycan-tsi. Tsaynogpis manami püta warmi-wan puricunantsipagtsu Tayta Dios-nintsi cuerpuntsita camamashcantsi, sinöga pay munashgannog cawanantsipagmi. ¹⁴ Tsaynogpis manami tsay runacuna nishgannog ushacänalan-tsipagtsu caycantsi, sinöga Jesucristuta Tayta Diosnintsi cawaritsimush-gannoglami nogantsitapis cawaritsi-mëshunpag.

¹⁵ ¿Manacu musyapäcunqui Jesu-cristuta chasquicur Tayta Diospa wamran caycashgantsita? ¿Tayta Diospa wamran caycartsurag püta warmiwan punucushun? ¿Waugui-cuna, tsaytaga ama rurapäcuysu! ¹⁶ ¿Manacu gamcuna musyanqui püta warmiwan punorga juc casta carpis paywan tsay castalana cay-cashgayquita? Warmiwan punogcu-napäga Tayta Diosnintsi pala-branchöpis caynogmi escribiraycan: “Warminwan tarnami jäpa jäpa carpis paywan tsay castalana ricacun.”^h

¹⁷ Tsay escribiraycashgannoglami Jesucristuta chasquicorga Jesucristu-wan tsay castalana caycantsi. Jesucristu-wan tsay castala caycarga ¿imanog-patag püta warmicunawan punucush-wan?

^{18,19} ¿Manacu musyapäcunqui gam-cunacho cananpag Santu Espirituta Tayta Diosnintsi cachamushganta? Tsaynogpis ¿manacu musyapäcun-qui Santu Espiritu tashgan templo

^h 6.16 Génesis 2.24.

carcaycashgayquita? Santu Espiritu tashgan templo caycarga majayqui-wannog piwanpis ama punucäriytsu.²⁰ Tayta Diosnintsi gamcunataga Jesucristupa yawarninwanmi rantipäcushushcanqui. Tayta Diosnintsi rantiyäshuptionaga jutsata mana ruraypana cawapäcuy.

**Majanwan mana
michänacunanpag tanyatsishgan**

7¹ Canan tanyatsishayqui cartata apatsimur tapucamashgayquipita. Tsay cartachöga gamcuna nimashcanqui majanwan punorga jutsata ruray-cashgantami.² Tsaynog niptiquipis manami tsaynogtsu caycan. Majayog cagcunaga majanwan punucutsun. Majayquiwan mana punuptiquega capaschari juncta chinäcunmanpis o juncta waynäcunmanpis.

^{3,4} Runantaga warmin cuerpunta ama michätsuntsu. Tsaynogla warmintaga runan cuerpunta ama michätsuntsu. Tsaypa trucanga warminta runan yamatsitsun y warmipis runanta yamatsitsun.^{5,6} Tsaynog caycaptenga gamcunaga amana cuerpuyquita michänacuynatsu. Majayquiwan wilanacurcurmi itsanga wilanacushgayqui junagyag awantacäriy. Waquincunaga tsaynog wilanacun ayunar Tayta Diosta lapan shongunwan manacunanpagmi. Tsaynog captinpis manami michaycätsu ayunagcuna majanwan mana punucunanpag cashganta. Gamcunapitanachari tsayga caycan. Itsanga tsay wilanacushgayqui junag cumpliptin majayquiwan pununqui. Tsaynog mana punuptiquega jucwanpis Satanás jutsata ruraycatsishunquimanmi.

**Majaynagcuna y majayogcuna imanog
cawananpag cashganpis**

⁷ Nogapa yarpaynëpitaga lapayquipis noganog majaynagla captiqui alimi canman. Imanog captinpis Tayta Diosnintsimi camamashcantsi majayog o majaynag canantsipagpis.

⁸ Viüdacunata y viüdacunataga noga yätsë noganog majaynag täcunanpagmi.⁹ Tsaynog niptëpis majaynag täcuyta mana camäpacur majayog caylapag yarparänanpa trucanga majanta ashicutsun. Majanta asherga manami jutsatatsu ruraycan.

¹⁰ Majayogcunaga majanpita ama raquicätsuntsu. Pipis majanpita mana raquicänanpagmi Señornintsi Jesucristupis yachatsengan.ⁱ ¹¹ Tsaynog captinpis runanpita raquicar imarga mana yapapacuylapa täcuntsun. Japan täcuyta mana camäpacorga jucwan mana taptega runanwan amistacutsun. Tsaynogla runa cagpis warminpita ama raquicätsuntsu.

¹² Jesucristuta warmiqui mana chasquicushganpita waquinniquicuna musyayta munarcaycanqui paypita raquicänayquipag o mana raquicänayquipagpis. Tsaypitaga Jesucristo manami imatapis nergantsu. Tsaynog captinpis Santu Espiritu tanyatsimaptinmi caynog në: Jesucristuta warmiqui mana chasquicuptinpis gamwan tayta munaptenga paypita ama raquicaytsu.¹³ Tsaynogla Jesucristuta runayqui mana chasquicuptinpis paypita ama raquicaytsu.¹⁴ Jesucristuta chasquicog warmiwan targa runan tanyacur capaschari Jesucristuta chasquicunmanpis.

ⁱ **7.10** Majayogcuna majanpita mana raquicänanpag Jesucristo yachatsishganta masta musyanayquipag liyinqui San Mateo 5.32; 19.9; San Marcos 10.11-12; San Lucas 16.18.

Tsaynoglami warmipis Jesucristuta chasquicog runawan targa tanyacur capaschari Jesucristuta chasquicunmanpis. Tsaynoglami wamrancunapis tayan o maman Jesucristo munashgannog cawagta ricar capaschari payta chasquicunmanpis.

¹⁵ Tsaynog captinpis Jesucristuta majan chasquicushgan achäqui warmi cag o runa cag cachariyta munaptin imaptinmi itsanga raquicäcunman. Tayta Diosnintsega manami munantsu majayogcuna mala vida pasananta. ¹⁶ Capaschari mana raquicap-tenga runa cagpis o warmi cagpis Jesucristuta chasquicunman salvasgha cananpag. ¹⁷ Imanog carpis Jesucristuta chasquicushgana caycarga ama yarpapäcuytsu Jesucristuta majayqui mana chasquicuptin raquicänayquipag cashganta. Tsaypa trucanga majayquiwan cuyanacur ali cawapäcuy Jesucristuta chasquicushga captinpis o mana chasquicushga captinpis. Tsaynog cawanayquipag gamcunata tanyatsishgänog-lami may-tsaychöpis waugui-panicunata tanyaycätsë.

Señalacushga carpis mana señalacushga carpis Jesucristo munashgannogla cawanantsipag tanyatsicuy

¹⁸ Cuerpuyqui mana señalashga caycar Jesucristuta chasquicorga ama yarpapäcuytsu cuerpuyquita señalacunayquipag cashganta. Tsaynogpis cuerpuyqui señalashga caycar Jesucristuta chasquicorga ama pengacuytsu cuerpuyqui señalashga cashganpita. ¹⁹ Señalashga cashgayqui y mana señalashga cashgayquipis iwal-lami caycan Tayta Diosnintsipäga. Itsanga payga munan señalashga o mana señalashga carpis payta cäsucur cawanayquitami.

²⁰ Jesucristuta chasquicushgana caycarga ama laquicuytsu señalashga o mana señalashga cashgayquipita.

Ashmay carpis mana ashmay carpis Jesucristo munashgannogla cawanantsipag tanyatsicuy

²¹ Tsaynogpis ashmay caycashpayqui Jesucristuta chasquicorga ama laquicuytsu ashmay cashgayquipita. Tsaynog captinpis ashmay caycashgayquipita pilapis jorgushuptiquega alimi canman yargucuptiqui.

²² Ashmay carpis o mana ashmay carpis Jesucristuta chasquicorga paypa maquinchönami carcaycanqui. ²³ Tayta Diosnintsi gamcunata Jesucristupa yawarninwanmi ranti-päcushushcanqui. Tsaynog caycap-tenga ama jutsata rurar cawapäcuytsu. ²⁴ Majayog carpis majaynag carpis, señalashga carpis mana señalashga carpis, ashmay carpis mana ashmay carpis gamcunaga Tayta Dios munashgannogla imaypis cawapäcuy.

Majayog cananpag o japala täcunanpag yachatsishgan

²⁵ Japala cagcuna majayog cananpag o mana majayog cananpag cashganpitaga Señorintsi Jesucristo manami yachatsishgatsu. Tsaynog captinpis apostolnin canäpag acramashga captinmi canan yätsishayqui. ^{26,27} Musyapäcushgayquinogpis Jesucristuta chasquicushgantsipita fiyupami nacaycantsi. Tsaynog caycap-tenga nogapa tanyaynépitaga majaynag cagcunaga japala täcuntsun. Majayog carmi itsanga majanpita ama raquicätsuntsu. ²⁸ Majanta ashicorga manami pipis jutsatatsu ruraycan. Tsaynoglami jipashpis tänanpag runata auniparga jutsatatsu mana

ruraycan. Itsanga majayog ricacur imapis aptarcunanpag mana captin nacangapagmi. Tsaymi noga yarpä tsaynog nacanarpa trucanga japala täcunanpag.

²⁹Waugui-panicuna, yupashga watalami cay patsacho cawashunpag. Tsaynog caycaptenga majayog carpis majaynag carpis Jesucristo munashgannog cawapäcuy. ³⁰Tsaynogla laquishga carpis o cushishga carpis pay munashgannog cawapäcuy. Imata rantirpis tsaylapäga ama yarparaytsu. ³¹Cay patsacho imaycapis ushacagla cananpag caycaptenga riquézalayquipäga ama yarparaytsu. ^{32,33}Warmiyog wauguicunaga más yarpachacärin warminwan ali cawanapag y wamrancunata ali ashmanapagmi. Warmiynag cag wauguicunami itsanga Tayta Dios munashgannog cawanapag más yarpachacärin. Tsaynog caycaptenga más alimi canman warmiynagla täcuptiqui. ³⁴Tsaynoglämi jipashcunapis japala car Tayta Dios munashgannog cawanapag yarpachacärin. Majayog cag warmicunami itsanga runanwan ali cawanapag más yarpachacärin. ³⁵Tsayta në manami majayog canayquita michartsu, sinöga majayog o majaynag canayquipagpis shumag yarpachacärinayquipagmi. Imanog carpis Tayta Dios munashgannog cawapäcuy.

³⁶Tsaynog captinpis pi jipashta warmin cananpag parlaparcu jorguyta munarga warminpag jorgu-

tsun. Tsaynog majatsacarga manami jutsatatsu ruraycan. ³⁷Tsaynogpis pi jipashta warminpag jorguyta mana munarga ama parlapätsuntsu. ³⁸Tsaynog captenga warminpag jorgurpis alitami ruraycan. Itsanga más alimi canman japala täcuptin.

³⁹Runan cawashganyäga warmi manami libritsu caycan juc runawan tänanpag. Runan wanuptinmi itsanga librina caycan jucwan täcunanpag. Tsaynog captinpis Jesucristuta mana chasquicog runawanga ama tätsuntsu. ⁴⁰Tsaynog captinpis nogapa yarpaynëpitaga viüda mananami yapapacunmannatsu. Tsaynog niycä nogapis Santu Espirituta chasquicushga carmi.

İdulucunapa jutincho pishtashgan aysata mana micunapag cashgan

8 ¹Waugui-panicuna, tantyarcaycanquinami idulucunapa jutincho pishtashgan aysata micushgayqui jutsa mana cashganta. Tsayta tantyarpis yarpachacäriy waquin cag yäracog mayintsita yarpachacuymana mana churanayquipag. ²Tantyacog cashgayquita yarparpis yäracog mayintsita yarpachacuyman churarga manami rasunpaga tantyacogtsu caycanqui. ³Tayta Diosta cuyar yäracog mayintspag yarpachacuptiquega Tayta Diosnintsimi lapanchöpis yanapashunquipag.

⁴⁻⁶Jesucristuta mana chasquicur waquin runacuna yarpapacun jana patsachöpis y cay patsachöpis tsaytsica dioscuna cashgantami. Tsaynog

¹8.1 Tsay witsanga Diosnintsita mana chasquicog runacuna ima fiestata rurarpis idulucunapa jutincho uywata pishtapäcog micapacunanpag. Tsaynog rurapäcog idulucuna Dios cashganta yarparmi. Jesucristuta chasquicogcunami itsanga tantyapäcorgan idulucuna Dios mana cashganta. Tsaynog tantyarpis costumbrin cashgannogmi tsay fiestacunaman micog aywapäcorgan. Tsaynog aywaptinmi waquin wauguipanicuna nipäcorgan tsay micushgan jutsa cashganta. Tsaymi jutsa cashganta o mana jutsa cashganta musyayta munar apóstol Pabluta tapucur cartata apatsergan. Tsay tapucushgantami Pablo cay cartacho tantyatsorgan.

yarpapäcuptinpis lapanpag munayniyog Tayta Diosnintsega juclaylami caycan. Paypita más manami juc diosga cantsu. Tsaynog caycaptenga manami idulucunatsu cay patsata ni jana patsatapis camashga, sinöga Jesucristuwan Tayta Diosnintsimi. Tayta Diosnintsimi nogantsitapis camamashcantsi Jesucristo munashgannog cawanantsipag.

⁷Idulucuna munayniynag captinmi jutincho pishtashgan uywapa aytsanta micuptiquipis jutsatsu mana caycan. Jutsa mana captinpis waquin waugui-panicuna yarpapäcun jutsa cashgantami. Jesucristuta manarag chasquicurmi paycunaga tsay aytsata micur idulucunata adorapäcog. Tsaymi Jesucristuta chasquicushgana caycarpis tsay aytsata yapay micur yarpapäcun iduluta adoragnogpis caycashganta. ⁸Tsaynog yarpapäcuptinpis waquinniqui tantyarcaycanqui tsay micuyta micurpis jutsata mana ruraycashgayquita. Rasunpapis manami fiesta micuyta micushgantsipitatsu o mana micushgantsipitatsu Tayta Diosnintsi salvamantsi, sinöga Jesucristuta chasquicushgantsipitami.

^{9,10}Tsaynog captinpis shumag tantyacäriy tsay fiestaman mana aywanayquipag. Runacunawan juntacaycur idulucunapa jutincho pishtashgan aytsata micuycagta ricashushpayquega mana tantyacog waugui-panicunapis micongapagmi. ¹¹Tsay micuyta micurmi iduluta adoraycashganta yarpashpan guepaman cuticärenga. Tsaynogpami paycunaraycu Jesucristo cruzcho wanushga captinpis manana salvacärenganatsu. ¹²Paycuna guepaman cuticunanpag cashganta musyaycar tsay aytsata micorga jutsatami ruraycantsi. ¹³Tsay-

nog caycaptenga idulupa jutincho uywata pishtashgan aytsata ama micushuntsu.

Apóstol cananpag Pabluta Tayta Diosnintsi acrashgan

9^{1,2} ¿Imanirtag yarparcaycanqui Jesucristupa apostolnin mana cashgäta? Tsaynog yarpaptiquipis Señornintsi Jesucristo yuriparcamar acramashga captinmi nogapis apostolnin caycä. Apostolnin car ali wilacuyninta wilapaptëmi chasquicärishcanqui. Tsaymi waquin runacuna mana tantyacuptionpis gamcunaga apostolnin cashgäta tantyacäriy.

³Gamcunata imatapis mana manacuptë waquinniqui caynog nircaycanqui: “Pabloga Jesucristupa apostolnin mana carmi imatapis mana manacamantsitsu. Apóstol mana captinchari imata chasquinanpagpis derëchun mana cantsu.” ⁴Tsaynog nipäcuptiquipis waquin yachatsicocunapanoglamni nogapapis derëchö caycan posädatsimänayquipag y pachäta garamänayquipagpis.

⁵Musyapäcushgayquinogpis Pedruwan waquin cag apostolcuna y Jesucristupa wauguincunapis Jesucristupa wilacuyninta wilacur puriptin warmintintami yanaparcaycan. Apóstol caycaptëga nogapapis derëchö caycanmi warmiynag captëpis yanapamänayquipag.

⁶Waquin apostolcunapapis derëchun caycaptenga ¿imanirtag yarpapäcunqui Bernabëpa y nogalapa derëchö mana cashganta? ⁷¿Pitag soldädo cayman yacunman quinpa gastuncunawan? Tsaynogpis ¿pitag cosechapacog aywar paylayninta mana chasquintsu? Tsaynogpis ¿pitag uyshayog car milwanta putscananpag mana rutuntsu? ^{8,9}Tsay-

nogلامي nogapapis derëchö caycan apóstol caycaptëga yanapamänayquipag. Moisés escribishgan leycunachöpis caynog nirmi escribiraycan: “Pachanta mana garaylapaga törucunata ama arutsiytsu.”^k Tayta Diosnintsi tsaynog nergan törucunata pachanta garashgantsinog wilacuy-ninta wilacogcunatapis yanapanantsipagmi. ¹⁰ Arogcuna jornalninta chasquinanpag derëchun cashgannog y cosehagcunapis paylayninta chasquinanpag derëchun cashgannogmi Jesucristupa wilacuy-ninta wilacogcunapis wilacushganpita chasquinanpag derëchun caycan. ¹¹ Nogacunami gamcunatapis Jesucristupa wilacuy-ninta wilapashcä. Tsaymi nogacunapapis derëchö caycan gamcuna yanapamänayquipag. ¹² Waquin wilacogcunata yanapanayquipag derëchun caycaptenga apóstol captë nogacunapapis derëchö caycanmi yanapamänayquipag.

Tsaynog captinpis noga yarpachacushcä gamcunapita imatapis mana chasquinäpagmi. Musyashgayquinogpis wilacushgäpita imatapis chasquiptë runacuna jamurpämmanmi caynog nishpan: “Payga wilacuyan guellaypag-rayculami.” Tsaynog jamurpämashpan wilacushgäta manami chasquicärengatsu. Tsayta mana munarmi quiquëcuna arushcä gastöcunapag. Tsaynogلامي imatapis mana chasquiylapa maytsaychöpis wilacurcaycä Jesucristupa wilacuy-ninta pï-maypis chasquicunanpag.

¹³ Tsaynog captinpis derëchö caycanmi wilacushgäpita chasquinäpag. Gamcunaga musyapäcunquimi templucho cag altarta pitsapocgcuna y

churapacogcunapis altarcho pish-tashgan aytsata micur cawapäcushganta. ¹⁴ Tsaynogلامي Jesucristupa wilacuy-ninta wilacogcunapapis derëchun caycan wilacushganpita chasquinanpag. Tsaynog cananpagmi Señornintsi Jesucristo nishga.

¹⁵ Derëchö tsaynog captinpis noga cushicömi gamcuna cagcho imatapis mana chasquiylapa wilacushgäpita. Tsaynogpis manami yanapamänayqui-raycutsu cay cartata apaycätsimö, sinöga Jesucristupa apostolnin cashgäta tanyacunayquipagmi. Wilacushgäpita cobranäpa trucanga jina wanucömanpis.

¹⁶ Manami quiquiläpitsatu wilacuycä, sinöga Tayta Diosnintsi acramashganpitami. Tsaynog acramashga caycaptin mana wilacuptëga jina algupis apacamanman. ¹⁷ Quiquiläpita wilacorga cobrämanpi cargan. Tayta Diosnintsi wilacünäpag churamashga captinmi mana cobrätsu. Tsaypa trucanga pägupag mana yarparaylapa ashmay arushgannog nogapis pägupag mana yarparaylapa Jesucristupa wilacuy-ninta wilacuycä. ¹⁸ Päguta chasquir cushicunäpa trucanga mana cobraylapa wilacushgäpita runacuna Jesucristuta chasquicuptinmi noga cushicö. Tsaymi mana cobraylapa wilacuycä, wilacushgäpita imata chasquinäpag derëchö captinpis.

¹⁹ Tsaynogلامي mayman chayarpis runacuna imanog cawashgantapis shumag tanyacur nogapis paycunog cawä pï-maypis Jesucristupa wilacuy-ninta chasquicunan cashga.

²⁰ Tsaymi Israel runacunawan juntacarga paycuna cawashgannog nogapis cawaycä. Moisés escribishgan leycunata paycuna cumplishgannogmi

^k 9.8,9 Deuteronomio 25.4.

nogapis cumplycä. Itsanga tanyacö tsay leycunata cumplishgalanwanga pipis mana salvacunapag cashgantami. Tsaynog captinpis Jesucristuta chasquicunan-raycumí paycuna cawashgannog nogapis cawaycä.

²¹ Mana Israel runacunawan juntacarpis paycuna cawashgannogmi nogapis cawaycä. Itsanga paycunawan juntacar jutsata mana ruraypa Jesucristo munashgannogmi cawaycä. Tsaynog cawaycä paycunapis Jesucristuta chasquicunan-raycumí. ^{22,23} Tsaynogلامي imalapis jutsa cashganta runacuna nipäcuptenga nogapag jutsa mana captinpis tsayta mana ruränatsu. Tsaynog may-tsaychöpis cawaycä Jesucristupa wilacuyyninta pī-maypis chasquicunan cashgami.

²⁴ Gamcuna musyapäcunquimi atsa cörrirpis lapanta yaleg cagla premiuta chasquishganta. Yaleg cag premiuta chasquishgannog gamcunapis Tayta Dios munashgannog imaypis cawapäcuy ciëlucho premiuta chasquipäcunayquipag. ²⁵ Cörrinapag o puclananpagpis yachacogcunaga shumagmi camaricärin. Paycunaga tsaynog camaricun gänar laurel jachapita rurashga corönata chasquinalanpagmi. Nogantsimi itsanga camaricuycantsi mana ushacag corönata chasquinantsipag. ²⁶ Tsaymi cörregcuna cörreg mayincunata yalinanpag shumag cörrishgannog o puclagcuna gänananpag shumag puclashgannog nogapis Tayta Diospa naupanman chay premiuta chasquinäpag pay munashgannog imaypis cawaycä. ²⁷ Cörregcuna yachacananpag waran waran cörrishgannogmi imanog nacarpis Tayta Dios-

nintsi munashgannog cawaycä. Tsaypa trucanga waquinta shumag yacharcatsirpis quiquëga Diospa naupanman manami chayashagtsu.

Chunyang jircacho Israel runacuna Diosta mana cäsucur cawashgannog mana cawanantsipag tanyatsicuy

10^{1,2} Waugui-panicuna, gamcuna musyapäcunquimi Israel runacunata unay ima pasashgantapis. Egipto nacionpita jorgamurmi Tayta Diosnintsi milagrucunata rurargan. Tsaymi pucutayta yuritsimorgan tsay pucutay guepalanpa Israel runacuna aywapäcunapag. Tsaynogpis Puca Lamarta ish-cayman raquergan chaupinpa pasapäcunapag. Tsaymi Jesucristuta chasquicur nogantsi bautizacushgantsinog paycunapis Moiseswan lamar chaupinpa pasar bautizacushganog cargan. ³ Tsaynogpis Tayta Diosnintsi camaripashgan micuyta paycuna lapanmi micapäcorgan. ⁴ Tsaynogلامي yacunaypita wanunanpag carcaycaptin gagapita yacuta Diosnintsi pashtatsimorgan lapan upupäcunapag. ^m Tsay gagaga yarpätsimantsi Jesucristupitami. Tsaynogلامي chunyang jircacho Diosnintsi waran waran nistashgancunatapis camaripargan. ⁵ Tsay milagrucunata ricaycarpis Tayta Diosnintsi atscagmi mana cäsucorgantsu. Tsaymi chunyang jircacho mana cäsucogcunataga Tayta Diosnintsi ushacätsergan.

⁶ Israel runacunata tsaynog castigargan nogantsipis tanyacur jutsata mana ruranantsipagmi. ⁷ Tsaynogpis idulucunata ama adorapäcuytsu. Israel runacunaga örüpita rurashga becërruta adorar jutsata rurashgan-

^l 10.3 Éxodo 16.4–31. ^m 10.4 Éxodo 17.1–7; Números 20.2–13.

pitami Tayta Diosnintsipa palabrancho caynog escribiraycan:

“Örupita becërrutanog ruray-curmi lapan micapäcorgan y upyapäcorgan.

Micuyta usharcurnami Diosta mana chasquicogcunanogpis olgucuna warmicunawan jutsata rurapäcorgan.”ⁿ

⁸ Tsaynogpis warmicunawan ama jutsata rurapäcuytsu. Israel runacunaga warmicunawan jutsata rurashganpitami Tayta Diosnintsi juc junaglachö ishçay chunca quimsa waranga (23,000) runacunata wanutsergan.^o

⁹ Tsaynogpis Tayta Diosnintsita ama obligashuntsu quiquintsi munashgantsita ruratsinantsipag. Israel runacuna quiquin munashgannog obligayta munaptinmi Tayta Diosnintsi castigargan culebracunawan picatsiypa. Tsay castiguwanmi tsaytsica runacuna wanupäcorgan.^p ¹⁰ Tsaynogpis Israel runacunata yanapananpag Tayta Diosnintsi Moiesta churaptinpis waquenga paypa contranmi rimapäcorgan. Tsaynog rimaptinmi angilninta Tayta Dios cachamorgan paycunata wanutsinanpag.^q

¹¹ Unay Israel runacunata tsaynog castigashganta Tayta Diosnintsipa palabrancho escribiraycan nogantsi canan witsanpis tantyacunantsipagmi. Jutsata rurashganpita Israel runacunata castigashgannogmi nogantsitapis jutsata ruraptintsega castigamäshunpag.¹² Tsaynog caycaptenga cuidädu Tayta Diosnintsi munashgannog cawaycashgayquicho gamcunapis jutsa rurayman tuninquiman.¹³ Jutsa rurayman tunitsimänantsipäga cay patsacho imalapis caycanmi. Tsaynog

captinmi imanogpapis jutsata mana ruranantsipag Tayta Diosnintsi tantyatsimantsi. Pay tantyatsimashgantsita çäsucorga jutsa rurayman manami tunishunpagtsu.

İdulucunata mana adoranapag tantyatsishgan

¹⁴ Israel runacuna iduluta adorashganpita Tayta Dios castigashga caycaptenga gamcunapis, waugui-panicuna, idulucunata ama adorapäcuytsu.¹⁵ Tanyacog runacuna carga tantyanquimanmi cay niycashgä rasunpa cashganta.¹⁶ Santa Cënachö vınuta upur çmanacu yarpantsi Jesucristo nogantsi-raycu yawarninta jichashganta? Tsaynogpis Santa Cënachö tantata paquipänacur çmanacu yarpantsi Tayta Dios salvamänantsipag Jesucristo cruzcho wanushganta?

¹⁷ Santa Cënachö juc tantalata lapan-tsi micur Tayta Diosta adorarmi maytsica carpis juclaylanog caycantsi.¹⁸ Israel runacunapis Tayta Diosta adoracunan altarcho pishtashgan aytsata micur lapanpis juclaylanog caycan. Tsaynogلامي pipis idulucunapa jutincho pishtashgan aytsata micorga tsay idulucunata adoragcunawan juclaylanog caycan.

¹⁹ İdulucunaga manami munayniyogtsu caycan. İdulupa jutincho uywata pishtaptinpis tsay iduloga imachöpis mana yanapantsu.²⁰ Tsaymi idulucunapa jutincho pishtashgan aytsata micorga idulucunata adoranapa trucanga demoniucunatami adorycan. Tsaynog caycaptenga idolo adörag runacunawan tsay aytsata micur gamcunapis demoniucunatami adorarçaycanqui. Nogaga

ⁿ 10.7 Éxodo 32.6. ^o 10.8 Números 25.1–9. ^p 10.9 Números 21.4–7. ^q 10.10 Números 14.1–38; 16.41–49.

manami munätsu demoniucunata adoranayquita. ²¹ Santa Cënacho vïnuta upuycarga ¿imanirtag Jesucristuta mana chasquicog runacunawan juntacar ïdulucunata adoranangep apashgan vïnutapis upurcaycanqui? Tsay vïnuta uporga demoniucunatami adorarçaycanqui. Tsaynogpis Santa Cënacho tantata micuycarga ¿imanirtag waquin runacunawan juntacar ïdulucunata adoranangep apashgan aytsata micurçaycanqui? Tsay aytsata micorga demoniucunatami adorarçaycanqui. ²² ïdulucunata adoranangep apapäcushgan vïnuta upur y aytsata micorga Tayta Diosnintsitami rabiaycätsinqui. ¿Manacu tantyapäcunqui Tayta Diosnintsita rabiatsiptiqui castigashunayquipag cashganta?

²³ Tsay aytsata micunayquipag y vïnuta upunayquipag libri caycarpis ama gongapäcuytsu micuptiqui yärocog mayintsi jutsata rurashgayquita yarpänangep cashganta. Jutsata rurashgayquita yarparga ¿imatarag gamcunapita yachaconga Tayta Dios munashgannog cawanangep? ²⁴ Tsaynog captenga ama quiquilayqui ali cawanayquipag yarpachacäriytsu, sinöga yärocog mayintsipis ali cawanangep yarpachacäriy.

²⁵ Mercäducho aytsata ranterga ïdulucunapag pishtashganta o mana pishtashgantapis mana tapupaylapa rantipäcuy. ²⁶ Cay patsacho cagcunaga lapanpis Tayta Diosnintsi camashganmi caycan. ²⁷ Tsaynog caycapitenga pilapis micunayquipag gayatsishuptiqui mana tapupaylapa garashushgayquita micuy. ^{28,29} Tsay gaya-tsishogniqui ima ïdulupagpis tsay micuyta rurashganta wilashuptiqui

itsanga tsay micuyta ama micuynatsu. Wilaycäshuptiqui tsay micuyta micuptiquega gayatsishogniqui runa yarpanga gamcunapis tsay ïdulucunata adorar micuycashgayquitami.

Tsaynog niptë waquinniqui caynog nircaycanqui: “Runacuna lutanta yarpashgalanpitaga ¿imanirtag mana micömantsu? ³⁰ Micuyta camaripämashganpita Tayta Diosta agradëcicur micuptëga manami pipis jamurpämänmantsu.” ³¹ Tsaynog niycarpis lutala micuptiquega runacuna yarpapäconga ïdulucunata adaraycashgayquitami. Tsaynog yarparmi Jesucristuta mana chasquicongatsu. Tsaymi micurpis, upurpis y imata rurarpis Jesucristuta runacuna chasquicunangep shumag cawashun. ³² Tsaynog caycaptenga yärocog mayintsi Israel runa captinpis mana Israel runa captinpis shumag yarpachacushun guepaman mana cuticunangep. ³³ Tsaymi nogapis shumagrag yarpachacö ima micuytapis micunäpag o mana micunäpagpis. Lapantapis noga rurä runacuna Jesucristuta chasquicur salvacunangepmi.

11 ¹ Jesucristuta cäsucur cawashgänogla gamcunapis cawapäcuy.

Tayta Diosta alabanapag juntacashgancho warmicuna umanta shucutacunapag tantyatsishgan

² Gamcuna imaypis yarpämaptiquimi cushishga caycä. Tsaynogpis cushicömi Jesucristupa wilacuyñinta yachatsishgäta mana gongapäcuptiqui. ³ Yachatsishgäta chasquicuptiquimi mastapis yätsircushayqui. Jesucristuta chasquicog warmicunaga runanta cäsucunangepmi caycan. Runacunaga Jesucristuta cäsucunangepmi.

^r 10.26 Salmo 24.1.

cur cawananpagmi caycan. Jesucristunami Tayta Diosta cäsucuycan.

⁴Waugui-panicuna juntacashgancho costumbrintsi cashgannogpis Tayta Diosta manacur o wilacuyñinta wilacur runaga manami umanta shucutacunmantsu. Umanta shucutacur Tayta Diosta manacog runaga Jesucristutami manacagman churaycan. ⁵Warmicunami itsanga waugui-panicuna juntacashgancho Tayta Diosnintsita manacur o wilacuyñinta wilacur umanta shucutacärinman. Costumbrintsi cashgannog umanta mana shucutacorga runantami manacagman churaycan. Agtsanta rutucur warmi pengaypag cashgannogmi umanta mana shucutacorga pengaypag caycan. ⁶Umanta shucutacuyta mana munag warmega mejor lapan agtsantapis gara putuypa rutucutsun. Agtsanta rutucuyta pengacorga umanta shucutacutsun.

⁷Runata camar Tayta Diosnintsi quiquin-niragtami camargan. Tsaymi waugui-panicuna juntacashgancho Tayta Diosnintsita alabar runacunaga umanta mana shucutacunmantsu. Warmicunami itsanga runanpa munaynincho cashpan umanta shucutacunman. Tsaynog shucutacunman runapita warmita Diosnintsi camashga captinmi. ⁸Manami warmipitatsu runata Tayta Diosnintsi camashga, sinöga runapitami warmita camashga. ⁹Tsaynogpis manami warmi japala captintsu runata camashga, sinöga runa japala captinmi warmita camashga. ¹⁰Tsaymi costumbrintsi cashgannog warmicuna umanta shucutacunman runanpa munaynincho cashpan. Umanta shucutacur runanpa munaynincho captinmi angilcunapis cushicärin.

¹¹Tsaynog captinpis ama yarpapäcuysu runapita warmi menos välish-

ganta. Warmi mana captenga runa manami canmantsu. Runapis mana captenga warmi manami canmantsu. ¹²Musyantsimi olgupita warmita Tayta Diosnintsi camashganta. Tsaynogلامي musyantsi warmipita olgupis yurishganta. Tsaynog cananpagmi Tayta Diosnintsi camargan.

¹³Waugui-panicuna, shumag tantyacäriy. Juntacashgayquicho ¿aliturag caycan warmicuna umanta mana shucutacuytapa Tayta Diosta manacuptin? ¹⁴¿Manaturag pengaypag caycan runa agtsanta winatsiptin? ¹⁵Tsaynog captinpis warmicuna agtsanta winatsiptenga camaragلامي caycan. Ata agtsayog car shucutacushganog captinmi musyantsi warmicuna shucutacunapag cashganta. ¹⁶Pipis tsay costumbrintsi manacagman churayta munarga shumag tantyacutsun. Waugui-panicuna juntacashgancho panicuna umanta imaypis shucutacärinmi. Tsaypita más juc costumbritaga nogacuna manami musypäcötsu.

Santa Cënata shumag tanyacuypa upupäcunanpag tanyatsicuy

^{17,18}Gamcunapag wilapämashga Santa Cënata upunayquipag juntacarga jagayätsinacuycashgayquitami. Gamcunaga pagta rasunpa tsaynog carcaycanqui. Santa Cënata upunayquipag tsaynog jagayätsinacuptiquega manami gamcunata: “Alitami ruraycanqui” nëmantsu. ¹⁹¡Achyä! Tsaynog jagayätsinacushpayquega Tayta Diosnintsi munashgannogchari cawarcaycanqui ¿au?

²⁰Tsaynog jagayätsinacushga caycar Santa Cënata upushpayquega manami Diosnintsi munashgannog-natsu cawarcaycanqui. ²¹Santa Cënata upunayquipag juntacarshi

waquinniquega ali micuyta apaycur micurcaycanqui. Wactsacunanashi munapar ricapaycāshunqui. Paycuna micōni caycaptinpis gamcunaga pachayqui juntashganyagshi micurcaycanqui y shincashgayquiaygshi vīnuta upyarcaycanqui. ²² ¡Tsaynog carga jutsatami rurarcaycanqui! Waquin cagta tsaynog munapātsinayquipa trucanga ¿imanirtag wayilayquicho mana micucunquitsu? ¿Imanirtag tsaynog rurarcaycanqui? ¡Tsaynog rurarga Tayta Diosnintsita manami cāsucuycanquitsu! Tsaynog cashgayquipitaga manami gamcunata “Alitami rurashcanqui” nishayquitsu.

Santa Cēnata discipuluncunawan Jesucristo upushganpita yachatsishgan

(Mateo 26.26–29; Marcos 14.22–25;

Lucas 22.14–20)

²³ Señornintsi Jesucristo Santa Cēnapita yachatsishgalantami nogapis yachaycātsē. Wanutsishga cananpag entreganan tsacaymi Señornintsi Jesucristo tantata aptarcur Tayta Diosta manacur agradēcicorgan. ²⁴ Nircur tantata paquircur caynog nergan: “Cay tantaga cuerpōmi caycan. Cay tantata micur imaypis yarpapācunqui gamcuna-raycu wanushgāta.” ²⁵ Cēnayta usharcurnami vīnuyog vāsuta aptarcur caynog nergan: “Cananpitaga cay vīnuta upur imaypis yarpapācunqui yawarnēta jichar gamcuna-raycu wanushgāta. Tsaynog wanuptēmi Tayta Diosnintsi mushog contrātuta ruranga chasquicamagcunata perdonananpag.” ²⁶ Jesucristo tsaynog nishganpitami Santa Cēnata uporga yarpantsi nogantsiraycu cruzcho wanushganta. Tsaynog yarpararmi Jesucristo cutimunanyag Santa Cēnata upushun.

Jutsata rurarcur Santa Cēnata mana upunantsipag yachatsicuy

²⁷ Pipis jutsata rurashga caycar Santa Cēnata uporga más jutsayogmi ricacun. Tsaynog uporga Jesucristo wanushganta manacagmanmi churaycan. ²⁸ Tsaymi Santa Cēnata upunayquipāga shumag tanyacāriy imanog cawaycashgayquitapis. ²⁹ Jutsayog caycar Santa Cēnata upuptiquega Tayta Diosnintsi castigashunquipagmi. ³⁰ Waquinniquicuna tsaynog upushgayquipitashi mana aliyaypa gueshyarcaycanqui y juc ish-cayga wanushghanashi canpis. ³¹ Santa Cēnata upunayquipāga shumagrag tanyacāriy jutsata rurashgayquipita perdonta manacārinayquipag. Perdonta manacāriptiquega Tayta Diosnintsi manami castigashunquipagtsu. ³² Castigarpis castigamantsi jutsa rurashgantsicunata cacharinantsipagmi. Tsaynog tanyacur jutsa rurashgantsicunata cacharriptintsega Tayta Dios mananami infiernuman gaycamāshunpagnatsu.

³³ Tsaynog captenga, waugui-panicuna, Santa Cēnapag juntacarga shuyānacunqui lapayqui upupācunayquipag. ³⁴ Micanarga manarag juntacar wayiquicho imalatapis puntata micapācuy. Tsaynogpami Santa Cēnacho shuyānacur lapantapis ali ruraptiqui Tayta Diosnintsi mana castigashunquipagnatsu.

Shamurnami waquin arreglaypag cagtaga arreglashagpag.

Santu Espiritu tucuy habilidācunata gomashgantsi

12 ¹ Waugui-panicuna, lapan-tsita Santu Espiritu habilidāta gomashgantsitami cananga musyatsiyta munaycā. ² Musyashgay-

quinogpis Jesucristuta manarag chasquicur gamcunaga mana tantyacushpayqui waquin runacunanogmi idulucunata adorar cawapäcorgayqui. ³ Tsaynog cawarga Jesucristuta manami cäsucorgayquitsu. Jesucristuta mana cäsucogcunaga manami mayganpis Santu Espirituta chasquicushgatsu. Tsaynogpis Jesucristuta chasquicur maquincho cawagcunaga lapanmi Santu Espirituta chasquicushga.

⁴ Santu Espiritupitami waquin waugui-panicuna juc habilidäta chasquin y waquincunanimi juc habilidäta chasquin. Manami lapan waugui-panicuna tsay habilidälata-tsu Santu Espiritupita chasquin, sinöga waquincuna jucta chasquin y waquincuna juctana chasquin. ⁵ Waquinninti juc habilidäta chasquir y waquinninti juc habilidäta chasquirpis lapantsimi Señorninti Jesucristuta maqui maqui sirviycantsi. ⁶ Tsaynoglami waquinninti juc habilidäta chasquiptinti y waquinninti juc habilidäta chasquiptintispis Tayta Diosninti lapantsita yanapamantsi munashganta ruranantsipag. ⁷ Cada ünuntsitami Santu Espiritu habilidäta gomantsi jucninti jucnintispis yanapanacunanantsipag.

⁸ Waquin waugui-panicuna Santu Espiritupita habilidäta chasquin shumag tantyacurcur waquinta tantyatsinanpagmi. Y waquinnami Santu Espiritupita habilidäta chasquin yachacurcur waquin cagtapis yachatsinanpag. ⁹ Tsaynoglami waquin cagcunapis Santu Espiritupita habilidäta chasquin Tayta Diosman shumag yäracur imatapis manacunanpag. Waquinnami habilidäta chasquin gueshyagcunata aliyätsinanpag. ¹⁰ Waquinnami habilidäta chasquin

Tayta Diosnintisman yäracur milagrucunata rurananpag y waquin cagnami habilidäta chasquin Jesucristuta wilacuyninta wilacunanpag. Tsaynoglami waquincunapis Santu Espiritupita habilidäta chasquin pipis lutanta yachaycätsishganta tantyacunanpag. Waquin cagnami habilidäta chasquin Santu Espiritu rima-tsiptin mana tantyashgan idiömacunacho parlamenpag y waquinnami habilidäta chasquin pipis juc idiömapa parlaptin runacuna tantyashgan idiömanchöna tsay parlashganta tantyatsinanpag. ¹¹ Lapantsitami Santu Espiritu jucnog jucnog habilidäta gomantsi waugui-panicunata yanapanantsipag.

Jesucristupa maquincho car juclaylanog cashgantsita tantyatsishgan

^{12,13} Musyantsimi runapa ricran-cuna, chancancuna y umanpis juc cuerpulacho cashganta. Tsaynoglami Santu Espirituta chasquicushpantisi lapantsipis juclaylanogna caycantsi. Tsaynog carnami Jesucristupa maquincho caycantsi Israel runa carpis y mana Israel runa carpis, ashmay carpis y mana ashmay carpis. Jesucristupa maquincho carmi lapantsipis Santu Espirituta chasquicushcantsi.

¹⁴ Runapa cuerpunchöga uman, chancan, maquin välinmi. ¹⁵ Chaquippis ¿“Mana maqui carga manami cuerpupatsu cá” nishganpitatsurag mana välinmantsu? ¹⁶ Tsaynogla rinripis ¿“Mana nawi carga manami cuerpupatsu cá” nishganpitatsurag mana välinmantsu? ¹⁷ Cuerpuntsi nawila captenga ¿imawanrag mayashwan? Tsaynogpis cuerpuntsi rinrila captenga ¿imawanrag asyaytapis mayashwan? ¹⁸ Tayta Diosninti munashgannogmi camamashcantsi

umantsitapis, ricrantsitapis y chancantsitapis. ¹⁹ ¡Imanograg cashwan cargan umalantsi captin o chancalan-
tsi captenga! ²⁰ Atsca parti carpis
cuerpoga juclaylami caycan.

²¹ Manami nawintsipis maquintsita
nimmantsu: “Manami gamta nistä-
tsu.” Tsaynoglami umantsipis cha-
quintsita mana ninmantsu: “Manami
gamta nistätsu.” ²²⁻²⁴ Tsaypa trucanga
cuerpuntsita Tayta Diosnintsi camash-
ga más pishitöpay cagcunata y mana
ricacag cagcunata más cuidanantsi-
pagmi. Tsaymi pishitöpay captin
nawintsita más cuidantsi. Ricrantsita
chancantsita manami aläpa cäsupan-
tsitsu. Tsaynog waquin cag particu-
nata más cuidarpis manami yarpan-
tsitsu mana väleg cashganta. Tsay-
noglami pengaynintsita pipis mana
ricananpag tsapacuntsi. Tsapacurpis
manami yarpantsitsu pengaynintsi
mana väleg cashganta. ²⁵ Tsaynog
captenga pishi töpay captinpis mana
pishi töpay captinpis, runa ricanan-
pag captinpis o mana ricananpag
captinpis cuerpuntsicho cagcunata
lapantami nistantsi. ²⁶ Cuerpuntsicho
imalantsipis nanaptenga laquicun-
tsimi. Aliyarga cushicuntsimi.

²⁷ Jesucristuta chasquicushgana
carga cuerpo juclayla cashgannog
lapantsimi juclaylanog caycantsi.
²⁸ Tsaymi Jesucristuman yäracogcu-
nata Tayta Diosnintsi waquinta
churashga apostolcuna cananpag,
waquinta churashga wilacuyninta
wilacunanpag y waquintana chu-
rashga yachatsinanpag. Tsaynogpis
waquinta churashga milagrucunata
rurananpag, waquinta churashga
gueshyagcunata aliyätsinanpag,
waquinta churashga wactsacunata
yanapananpag, waquinta churashga
shumag yätsicog cananpag y waquin-

tanami churashga mana tanyash-
gan idiömacunacho parlananpag.
²⁹ Manami lapantatsu Tayta Dios-
nintsi churashga apóstol cananpag,
o wilacog cananpag, o yachatsicog
cananpag, o milagrucunata rura-
nanpagpis. ³⁰ Tsaynogpis manami
lapantatsu Tayta Diosnintsi chu-
rashga gueshyagcunata aliyätsinan-
pag, o mana tanyashgan idiömacu-
nata parlananpag, o mana tan-
tyashgan idiömapa parlashganta
runacunata tanyatsinanpagpis.
Tsaynog caycaptenga ama laquicä-
riytsu Santu Espiritu goshushgayqui
habilidadä waquin waugui-panicunata
goshgan habilidadänog mana captin.
³¹ Laquicärinayquipa trucanga yar-
pachacäriy Tayta Diosman yäracog
mayintsiwan cuyanacunayquipag.
Cuyanacunayquipag cagpitami
canan tanyatsishayqui.

Cuyanacunantsipagpis tanyatsicuy

13 ¹ Cay patsacho lapan idiöma-
cunata parlarpis o angilcu-
nata idiömanta parlarpis mana cuya-
cog captëga platilluta lutala tuca-
r chinchinyagnoglami lapan parlash-
gäcunapis caycan. ² Jesucristupa
wilacuyninta shumag wilacurpis o
ima pasanapanpag cagcunata musyar-
pis o pi-may runapita más yacharpis
mana cuyacog carga manami ima-
pagpis välëtsu. Tsaynoglami Tayta
Diosnintsiman yäracur jirca witicu-
nanpag niptë witicuptinpis mana
cuyacog carga manami imapagpis
välëtsu. ³ Tsaynogpis wactsacunata
lapan imaycäcunata raquiparpis o
runa mayë-raycu wanuyta tarirpis
mana cuyacog carga manami ima-
pagpis välëtsu.

⁴ Cuyacog carga runa mayintsi
imata ashlimaptintsipis awantacun-

tsimi. Tsaynogpis cuyacog carga runa mayintsita manami chiquintsitsu, sinöga cuyapantsimi. Tsaynogpis manami yachag-tucuntsitsu ni runa-tucuntsitsu. ⁵ Tsaynogpis manami manacagcunata parlantsitsu, ni michapis cantsitsu. Tsaynogpis manami rabianaycantsitsu ni pitapis nanag nawintsipa ricapaycantsitsu. ⁶ Tsaynogpis manami pitapis cushipaycantsitsu. Mana alicunata ruraptin cushicunantsipa trucanga alicunata ruraptinmi cushicuntsi. ⁷ Cuyacog carga runa mayintsi chiquimaptintispis manami wasanta rimantsitsu. Jucpa wasanta rimaptinpis manami rimäshintsitsu. Lutanta ruraptinpis tantyatsintsimi alita rurar cawanapag. Imata ashlimaptintispis upälacuntsimi.

⁸⁻¹⁰ Jesucristo shuntacamashgantsiyagلامي wilacuyrintapis wilacuycäshun, Santu Espiritupis juc idiömacho rimatsimäshun y wilacuyrintapis tantyatsimäshun. Tayta Diospa naupanman chayarnaga tsaycunata mananami nistashunnatsu. Tsaynog captinpis Tayta Diosnintsiwan y runa mayintsiwanmi itsanga imayyagpis cuyanacuycäshunpag. ¹¹ Nogapis wamra carga wamranogلامي parlargä y yarpachacorgäpis. Auquinyarnaga mananami wamranognatsu yarpachacö. Tsaynogلامي Jesucristo shuntacamaptintsi Santu Espiritu gomashgantsi habilidäcunatapis mana nistashunnatsu. ¹² Cananga auquis espëjuwan ricacognogpis shumäga manaragmi tantyantsiragtsu Diosnintsi imanog cashganta. Gloriacho paywan tincurnami itsanga shumag tantyashunpag.

¹³ Cay patsacho lapan ushacaptinpis manami imaypis ushacangatsu Tayta Diosnintsiman yäracushgantsi,

gloriaman pushamänantsipag promitishgantsi y cuyanacushgantsipis. Tsay quimsanpitapis más alega caycan cuyanacushgantsimi.

Mana tantyashgan idiömacunacho Santu Espiritu rimatsishgan

14 ¹ Tsaynog caycaptenga gamcuna shumag cuyanacur cawapäcuy. Tsaynogpis Tayta Diosnintsita manacäriy paypa ali wilacuynta pï-maytapis shumag tantyatsinayquipag. ² Runacuna mana tantyashgan idiömapa wilacuptiquega manami pipis tantyashunquipagtsu imata parlaycashgayquitapis. Tsaypa trucanga Tayta Diosnilantsimi tantyashunquipag. ³ Tantyashgan idiömapa wilacuptiquimi itsanga lapan nishgayquitapis runacuna tantyashunquipag. Tsaymi cushicur shumag yachacärenga Tayta Diosnintsi munashgannog cawapäcunanpag. ⁴ Mana tantyashgan idiömapa wilacorga tsay wilacog waugui quiquilanmi cushicun. Runacuna tantyashgan idiömapa wilacuptinmi itsanga lapanpis cushicur tantyacun Tayta Diosnintsi munashgannog cawanapag.

⁵ Ama yarpapäcuytsu mana tantyashgan idiömacho wilacushgayqui mana ali cashganta. Tsaynog captinpis más ali caycan runacuna tantyashgan idiömacho wilacuptiquimi. Mana tantyashgan idiömacho wilacuptiquega maygalanpis canman runacunata tantyatsinanpag. Tsaynog tantyatseg captenga alimi canman juc idiömacho wilacuptiquipis.

⁶ Waugui-panicuna, shumag tantyacäriy. Gamcunaman watucog shamur mana tantyashgayqui idiömacho yachatsiptë ¿imanogparag yachacäriquinman? Tantyashgayqui idiömacho

yachatsiptëmi itsanga cushicur shumag chasquicärinquipag. ⁷ Pincullutapis arpatapis lutala tucaptenga manami tantyacuansu imata tucaycashganpis. ⁸ Tsaynogpis guërraman aywar cornëтата lutala tucaptenga soldäducunapis manami camaricunmansu pelyaman aywananpag. ⁹ Tsaynoglami waugui-panicuna juntacashgancho mana tantyashgan idiömapa wilacuptiquega mana tantyangatsu. Imata nishgayquitapis mana tantyar manami imatapis yachacärengatsu. Tsaynog wilacorga manacaglapagmi wilacuycanqui.

¹⁰ Musyashgantsinogpis atscami idiömacuna caycan. Lapan idiömata mana tantyarpis quiquinpa idiömantaga pipis tantyanmi. ¹¹ Tsaynog captinpis mana tantyashgä idiömachopipis parlapämaptenga imata niycämashgantapis manami tantyashgatsu. Tsaynoglami paycuna mana tantyashgan idiömachoparlaptë imata niycashgätapis mana tantyamangatsu. ¹² Tsaynog caycaptenga ¿imanirtag munarcaycanqui runacuna mana tantyashgan idiömachowilacuyta? Tsaypa trucanga yarpachacäriy runacuna tantyashgan idiömachowilacunayquipag. Tsaynogpami runacuna yachaconga Tayta Diosnintsi munashgannog cawananpag. ¹³ Imanog captinpis runacuna mana tantyashgan idiömachowilacuyta munarga Tayta Diosnintsita manacäriy wilacushgayquita tantyatsinayquipag.

¹⁴ Tsaynoglami caycan Santu Espiritu parlatsimaptin mana tantyashgä idiömachowilacuyta manacuptëpis. Mana tantyashgä idiömachowilacuyta manacorga manami tantyätsu imata niycashgätapis. ¹⁵ Tsaynog captenga manami Santu Espiritu parlatsimashgan idiömalachötsu manacushag,

sinöga tantyashgä idiömachöpis Tayta Diosnintsita manacushagmi. Tsaynogpis manami Santu Espiritu parlatsimashgan idiömalachötsu Tayta Diosta alabashag, sinöga tantyashgä idiömachöpis alabashagmi. ¹⁶ Gamcunapis runa mana tantyashgan idiömalachowilacuyta Tayta Diosta alabaptiquega waquin runacuna gamcunawan juntumana manami alabayta camäpacärengatsu. ¹⁷ Lapan shonguyquiwancushishga alabaptiquipis paycunaga upälalami ricapäshunquipag.

¹⁸ Gamcunata yanapashushgayquionoglamini nogatapis Santu Espiritu yanapaman mana tantyashgä idiömachowilacuyta Tayta Diosta manacunäpag yalabanäpagpis. Tsaynog yanapamaptinmi Tayta Diosta agradëcicö.

¹⁹ Tsaynog captinpis waugui-panicuna juntacashgancho manami mana tantyashgan idiömachötsu parlä, sinöga tantyashgan idiömachömi. May rätau mana tantyashgan idiömachowilacuyta trucanga más alimi caycan walcalatapis tantyashgan idiömachowilacuyta.

²⁰ Waugui-panicuna, runa mana tantyashgan idiömachowilacushpayqui ¿imanirtag yarparcaycanqui ali wilacog cashgayquita? Tsaynog yarparga wamra yarpashgannoglamini yarparcaycanqui. Jutsa ruraycunapagmi itsanga wamra yarpayla capäcunquiman. ²¹ Tayta Diosnintsega palabanchöpis caynogmi niycan:

“Israel runacunata castigarmi juc nacionpita runacunata cachamushag munayninman churananpag.

Mana tantyashgan idiömachowilacuyta parlaptinmi imata parlashgantapis mana tantyapäcongatsu.

Tsaynog castigaptëpis manami cäsucamangatsu.”⁵

²²⁻²⁵ Tsay escribiraycashgannogmi gamcuna cagchöpis runa mana tanyashgan idiömacho parlaptiqui Jesucristupa wilacuyninta mana chasquicongatsu. Chasquicunanpa trucanga löcu cashgayquitami yarpapäconga. Tanyashgan idiömacho wilacuptiquimi itsanga tanyapäconga Tayta Diosninti gamcunawan caycashganta. Tsaynogpis tanyapäconga Tayta Diosta mana cäsucur jutsata ruraycashganta. Tsaymi gongurpacuycur perdonta manacushpan Tayta Diosnintsita alabangapag.

**Waugui-panicuna
juntacashgancho desordinta
mana rurananpag tanyatsicuy**

²⁶ Tsaynog captenga juntacashgayquicho salmucunata cantarpis, Jesucristupa wilacuyninta yachatsirpis, Tayta Dios tanyatsishushgayquita wilacurpis, runa mana tanyashgan idiömacho parlarpis y tsay parlashganta waugui-panicunata tanyatsirpis lapanta rurapäcuy waugui-panicuna yachacur Tayta Diosninti munashgannog cawapäcunanpag.

²⁷ Mana tanyashgan idiömacunacho parlarga juc ishçay wauguila truncanacuyta parlatsun. Tsay parlashgan taga juc wauguina tanyatsitsun.

²⁸ Pilapis tanyatsinanpag mana captenga upälacäritsun. Mana tanyashgan idiömacho parlananpa trucanga shongulanchöna Tayta Diosnintsita manacutsun.

²⁹ Tsaynogla waugui-panicuna juntacashgancho pipis: “Diosnintsimi caynog tanyatsimashga” nir wilacurpis juc ishçayla wilacutsun. Nir-

cur mayagcuna tanyacäritsun tsay wilacushgan Diosnintsipita cashganta o mana cashgantapis. ³⁰ Imatapis wilacunanpag juc wauguina Tayta Diosninti tanyatsiptenga parlaycag waugui upälacutsun jucag wauguina parlamunanpag. ³¹ Tsaynogpami lapanpis parlayta munag cäga parlamonga waugui-panicuna yachacäri nanpag. ³² Parlanayquipag Tayta Diosninti tanyatsishuptiquega ama yarpapäcuytsu jucla parlanayquipag cashganta. Tsaypa trucanga jucniqui jucniquipis parlanayquipag shuyäncäriy. ³³ Tayta Diosnintsega desordin cananta manami munantsu, sinöga lapanpis shumag ordenädu canantami munan.

³⁴ May-tsaychöpis waugui-panicuna juntacashgancho warmicuna lutala mana parlacushgannog gamcuna cagchöpis warmicuna lutalaga ama parlacutsun. Lutala parlacunanpa trucanga Tayta Diosninti palabrancho nishgannog warmega runacunata respitanman. ³⁵ Tsaynog captenga imatapis mana tanyar imarga desordinta rurananpa truncan wayinman cutiycur runanta tapucutsun. Waugui-panicuna juntacashgancho lutala imatapis parlarga respëtuynagmi caycan.

³⁶ ¿Imanirtag yarpapäcunqui gamcunala Jesucristupa wilacuyninta yachashgayquita? ³⁷ Rasunpa Tayta Diosnintsipa wilacognin carga o Santu Espiritu tanyatsishgan runa carga tanyacunquimanmi cay cartacho nishgäcuna Jesucristo munashgannog caycashganta. ³⁸ Cay cartacho nishgäcunata pipis mana chasquicuptenga payta ama cäsupaytsu.

⁵ 14.21 Isaías 28.11–12.

³⁹ Tsaynog caycaptenga Tayta Diosnintsi tantyatsishushgayquicunata runacuna tantyashgan idiömachö wilacäriy. Tsaynog captinpis mana tantyashgan idiömachö wilacuptin pipis tantyatseg captenga ama michaytsu. ⁴⁰ Itsanga juntacashgayquicho Tayta Diosnintsi munashgannogla lapantapis ordeñadu rurapäcuy.

Jesucristo cawarimushgan

15 ¹ Waugui-panicuna, gamcuna cagman shamur Jesucristupa wilacuyñinta wilacuptë cushishgami chasquicärishcanqui. Cananpis tsaynogلامي cushishgala yachacurcaycanqui payman yäracur imaypis cawapäcunayquipag. ² Tsay ali wilacuyñinta chasquicur Tayta Dios munashgannog cawarga gloriamanmi chayanquipag. Tayta Dios munashgannog mana cawarga manacaglapagmi wilacuyñintapis chasquicärishcanqui.

³ Gamcunata yachatsishcä yachacushgalätami. Tsay yachatsishgäga caynogmi niycan: Jutsa rurashgantsita perdonamänantsipagmi Tayta Diosnintsi palabrancho escribiraycashgannogla Jesucristo cruzcho wanushga. ⁴ Tsaynogpis Tayta Diosnintsi palabrancho escribiraycashgannogلامي Jesucristo wanur pamparashganpita quimsa junagta cawarimushga. ⁵ Cawarircamurnami puntata yuripargan Pedruta. Tsaypitanami yuripargan chunca ishca (12) apostolnincunata. ⁶ Nircurnami pitsga pachac (500) waugui-panicuna juntacashga caycagtapis yuripargan. Tsay waugui-panicuna juc ishca wanucushgana captinpis waquenga cawarcaycanragmi. ⁷ Santiaguta yuriparcur-

nami waquin apostolnincunatapis yuripargan. ⁸ Tsaypitaragmi mana väleg captëpis nogata yuripämashga.

^{9,10} Jesucristo manarag yuripämäpintin nogaga payta chasquicogcunata gaticacharmi ushargä. Tsaynog lutanta rurashga caycaptëpis Tayta Diosnintsimi cuyapämashpan acramashga apostolnin canäpag. Apostolnin canäpag churarcamashpanmi yanapaycäman Jesucristupa wilacuyñinta wilacunäpag. Tsaynog yanapämäpintinmi waquin apostolcunapitapis masrag Jesucristupa wilacuyñinta wilacuycä. ¹¹ Waquin apostolcuna wilacurpis o noga wilacurpis Jesucristupa wilacuyñintami wilacärishcä. Tsay ali wilacuyta mayarmi Jesucristuta chasquicärishcanqui.

Wanushga runacuna cawarimunanpag cashgan

¹² Jesucristo wanushganpita cawarimushga caycaptenga çimanirtag waquinniqui rimarcaycanqui wanushcuna mana cawarimunanpag cashganta? ¹³ Wanushcuna mana cawarimunanpag captenga Jesucristupis wanushganpita manami cawarimunantsu cargan. ¹⁴ Mana cawarimushga captenga manacaglapagmi paypa wilacuyñinta wilacärëman. Tsaynog captenga Jesucristuta manacaglapagmi chasquicärishcanquipis. ¹⁵ Tsaynogpis wanushcuna mana cawarimunanpag captenga Jesucristuta Tayta Diosnintsi cawaritsimushganta wilacurpis lulacurmi puripäcöman.

¹⁶ Wanushcuna mana cawarimunanpag captenga Jesucristupis wanushganpita manami cawarimushgatsü.

¹⁷ Tsaynogpis Jesucristo mana cawarimushga captenga payta chasquicur-

^{15.6} Tsaynog nishpanmi Pablo tantyatsergan cay cartata escribishgan witsan cawaycashganta.

pis jutsata rurashgantsipita manami perdonashgatsu cashwan. ¹⁸ Tsaynog captenga Jesucristuman yäracuyar wanogcunapis wanushgalanchömi usharanman cargan. ¹⁹ Wanushgantsipita mana cawarimunantsipag captenga Jesucristuman yäracushgantsipis manacaglapagmi caycan.

²⁰ Waugui-panicuna, shumag tantyacıriy. Jesucristoga rasunpami wanushganpita cawarimushga. Puntata pay cawarimushga captinmi musyantsi nogantsipis cawarimunanpsipag cashganta. ²¹ Jutsata Adán rurashganpita wanunantsipag cashganta musyashgantsinogmi Jesucristo cawarimushgannog nogantsipis cawarimunantsipag cashganta musyantsi. ²² Adanlapita mirashgacar lapan runacuna wanogلامي carcaycan. Jesucristuta chasquicurmi itsanga lapan cawarimonga gloriacho cawananpag.

²³ Puntataga Jesucristutami Tayta Diosnintsi cawaritsimushga. Jesucristo cutimuptinragmi payta chasquicogcunata cawaritsimongapag. ²⁴ Tsaypitanami juicio final cangapag. Tsaychönami Satanasta y contran sharcogcunatapis Jesucristo infiernuman gaycongapag. Nircurnami lapan imaycatapis Tayta Diospa munayninman entregangapag. ²⁵ Tayta Diosnintsi palabanchöpis niycan lapan camashgancunata maquincho tsararashpan contran cagcunata vincinanpag cashgantami. ²⁶ Tayta Diosnintsiman lapanta entregaycup-tinnami wanuyypis manana canganatsu. ²⁷ Tayta Diospa palabanchöpis Jesucristupag caynogmi niycan: “Paypa munayninman lapantami Tayta Diosnintsi churashga.”^u (Tsay-

nog niptinpis Jesucristoga Tayta Diosnintsi maquinchömi caycan.) ²⁸ Tsausage Jesucristupa munayninman Tayta Dios lapantapis churashga captinmi Jesucristupis Tayta Diospa munayninman lapanta cutitsengapag. Tsaynogpami Tayta Diosnintsi lapan imaycatapis maquincho tsararanga-pag.

²⁹ Waugui-panicuna, ¿imanirtag yarparcaycanqui wanushcuna mana cawarimunanpag cashganta? Wanushcunata Tayta Diosnintsi mana cawaritsimunanpag caycaptenga ¿imalapagrag wanushcunapa trucan waquinniqui bautizacäriquipis? ³⁰ Tsaynogpis wanushcuna mana cawarimunanpag captenga ¿imapagrag wanuy cawaypis wilacur purircaycäman? ³¹ Tsay wilacuyta wilacur puriptëmi waran waran maypa aywaptëpis wanutsimayta munar caycan. Tsaynog captinpis manami laquicötsu, sinöga salvacunayquipag Jesucristuta chasquicushga captiquimi cushicö. ³² Cay Efeso marcachöpis fiyu runacuna chiquimashpanmi wanutsimayta munapäcamargan. Wanushcuna mana cawarimunanpag captenga ¿tsayjinanpa imapagtag tsaynog chiquishgapis purëman? Tsaynog chiquishga canantsipatrucanga waquin runacuna nishgan-nogla nogantsipis cawashun. Paycunaga caynogmi nircaycan: “Wanurpispachantsitami apashonga. Tsaymi cawashgantsiyag micushun upushun.”^v

³³ Runacuna tsaynog nishgantaga ama cäsupaytsu. Mana ali amigucunaga lutanta ruranyquipagmi yätsishunquipag. ³⁴ Shumag tantyacushpayqui jutsa ruraycunata cachariyna.

^u 15.27 Salmo 8.6. ^v 15.32 Isaías 22.13.

Waquinniquega jutsa ruraylacho cawashpayqui Tayta Diosnintsita manami rasunpatsu chasquicärishcanqui. Tsaynog cawashgayquega pengaypagmi caycan.

**Wanushcuna cawarimuptin
cuerpun imanog cananpag
cashganta tantyatsishgan**

³⁵ Wanushcuna mana cawarimunanpag cashganta yarparmi waquinniquega caynog nircaycanqui: “¿Imanograg ushacashgana caycarga wanushcuna cawarimonga? Cawarimuptin ¿imanograg cuerpun canga?”^{36,37} Tsaynog yarparga upa yarpaymi carcaycanqui. Nogantsi imatapis murorga manami yöratatsu muruntsi, sinöga murutami. Tsaypitaragmi shulun winamun trügu carpis o maygan tsaqui micuy carpis. Tsaynog winamuptin manami mamayruntatsuricantsi, sinöga yöratanami. Mamayronga ismur ushacanmi.³⁸ Mamayrun ismur ushacaptinpis Tayta Diosnintsicamashgannoglami cada casta murupita yöra winamun.³⁹ Lapan casta aytsapis juc-nirag juc-niragmi caycan: runapa carpis, uywapa carpis, päregpa carpis y pescädupa carpis.^{40,41} Tsaynoglami intipapis, quillapapis y estrellacunapapis atsicayaynin juc-nirag juc-nirag caycan. Tsaynogpis ciélucho cagecunaga manami cay patsacho cagecunanogtsu caycan.^{42,43} Tsaynoglami nogantsipapis cawarimuptintsi ciéluchöga cuerpuntsi juc-niragna cangapag. Canan cag cuerpuntega wanuptintsi ushacänanlagmi caycan. Cawarimog cag cuerpuntsimi itsanga imaypis mana ushacanganatsu.⁴⁴ Canan cag cuerpuntega cay patsacho cawanalantsi-

pagmi caycan. Wanushgantsipita cawarimuptintsimi itsanga cuerpuntsi gloriacho cawanantsipagna canga.

⁴⁵ Tayta Diosnintsipa palabanchöpis niycan alpaita camarcu Adanta cawayta goshgantami.^w Adanta cawayta goshgannoglami nogantsipapis mana ushacag cawayta Jesucristo gomäshunpag.⁴⁶⁻⁴⁹ Cay patsacho captintsega Adanpa cuerpun ushacagla cashgannogmi nogantsipapis cuerpuntsi ushacagla caycan. Gloriacho captintsinami itsanga Jesucristupa cuerpun mana ushacag cashgannog nogantsipapis cuerpuntsi mana ushacagna cangapag. Itsanga puntata chasquintsi ushacag cuerputa cay patsacho cawanantsipag. Tsaypitagmi mana ushacag cuerputa chasquishun gloriacho imayyagpis cawanantsipag.⁵⁰ Tsaynog captinmi aytsantin tuluntenga pipis Diospa naupanman mana chayangatsu. Ushacag cuerpuntega manami gloriacho cawanantsipagtsu caycan, sinöga cay patsacho cawanalantsipagmi.

⁵¹ Waugui-panicuna, ama yarpapäcuytsu lapantsi wanunantsipag cashganta, sinöga Jesucristo cutimur shuntamashpantsemi wanushga captintsipis o cawaycaptintsipis elagpita cuerpuntsita mushog cuerputa man ticsratsengapag.⁵² Tsaynöga elagpita ticsrashunpag último cag cornëtata tucaramuptinmi. Tsay junagmi wanushcuna mana ushacag mushog cuerpuyogna cawarimongapag. Cawaycagcunapis tsaynoglami mushog cuerpuyog elagpita ricangapag.⁵³ Mushog cuerpuyogragmi ricacushun Tayta Diosnintsipa naupancho imayyagpis cawanantsipäga.

^w 15.45 Génesis 2.7.

^{54,55} ¡Tayta Diosnintsi camarishgan mana ushacag cuerputa chasquishpantisi imarag cushicuycushunpag! Tsaychöga wanuy mananami canganatsu. Tsaynog cananpagmi Tayta Diosnintsi palabranchöpis caynog escribiraycan: “Wanuyga manacagman churashganami caycan.”^x ⁵⁶ Palabranchö tsaynog escribiraycaptinpis Tayta Diospa mandamientuncunata mana cäsucushganpitami runacuna lapanpis wanupäcun. ⁵⁷ Jesucristuta cachamur Tayta Diosnintsi salvamaptintsimi itsanga wanushgantsipita cawarimushunpag. Tsaynog salvamashgantsipita Tayta Diosnintsi imaypis agradécicushun.

⁵⁸ Tsaynog caycaptenga, cuyay waugui-panicuna, wanunantsiyag Tayta Diosnintsi munashgannog imaypis cawashun. Tsaynogpis cushi cushila Jesucristupa wilacuyninga imaypis wilacushun. Musyashgayqui-nogpis Tayta Diosnintsi sirvycashgantsega manami manacaglapagtsu caycan.

**Wactsa waugui-panicunapag
ofrendata imanogpis shuntananpag
tanyatsishgan**

16 ¹ Jerusalemcho cag wactsa waugui-panicunapag ofrendata shuntarga shuntapäcuy Galacia provinciacho caycar yätsishgänogla. ² Paycunata yätsir caynogmi nergä: Semäna arur gänapacushgayquipita cada domingo shuntapäcunqui ofrendata. Tsayta shuntanqui noga chämüpté camarishga caycagta entregamänayquipag. Ama shuyaraytsu noga chämüptërag shuntapäcunayquipag. ³ Tsaynogpis Jerusalemman

shuntashgayqui ofrendata apananpag juc ishca y waugicunatapis acrapäcuy. Quiquë chaycamurnami paycunapag cartata rurashag Jerusalemman ofrendata apaptin waugui-panicuna chasquicunapag. ⁴ Nogapis aywanäpag camacaptenga paycunawanmi aywashagpag.

**May-tsaypapis aywananpag
Pablo yarpushgan**

⁵ Gamcuna cagman shamur Macedonia provinciaparagmi tumamushag. ⁶ Chayaycamorga capasmi hasta tamya quilla pasananyag tsaycho täshagpag. Tsaypitanami gamcuna yanapamanqui waquin marca-cunamanpis aywanäpag. ⁷ Manami pasädalaga gamcunata watucuyta munätsu. Tsaypa trucanga Tayta Diosnintsi munaptin gamcuna cagcho täshagragmi. ⁸ Tsay nishgänog cay Efesupita shamushag Pentecostés fiesta^y ushaycuptinragmi. ⁹ Runacuna chiquiycämaptinpis Tayta Diosnintsi yanapaycämanmi cay marca-cunacho ali wilacuyninga wilacunäpag. Tsaynog wilacuptëmi atscarunacuna Jesucristuta chasquicucaycan.

¹⁰ Wauguinti Timoteupis noganogmi Jesucristupa wilacuyninga wilacur puriycan. Gamcuna cagman pay chämüptin cushishgala chasquicäriinqui. ¹¹ Paytaga maygayquipis manacagman ama churaytsu. Shumag chasquicäriptiquega cushishgami noga cagman cutimongapag. Nogacunapis payta caycho shuyarpaycämi.

¹² Gamcuna cagman waquin waugicuna shamüptinmi Apolusta ruwacorgä

^x 15.54,55 Isaías 25.8; Oseas 13.14. ^y 16.8 Pentecostés nishgan fiestata rurapäcog mayo quilla ushay o junio quilla galaycunanchömi.

paycunawan juntu shamunanpag. Tsaynog ruwacuycaptëpis pay manami shamuyta camäpacushgatsu. Capas nircurrag shamonga.

Carta ushanan

¹³ Imapitapis alcäbu capäcuy. Imanog nacarpis Tayta Diosnintsi munashgannog cawapäcuy. Tsaynogla imatapis mana mantsacuyya Tayta Diosnintsiman imaypis yäracäriy. ¹⁴ Pï-maywanpis cuyanacur shumag cawapäcuy.

¹⁵ Waugui-panicuna, musyapäcunquimi wauguinsi Estéfanas castancunawan Acaya provinciacho Jesucristuta puntata chasquicushganta. Tsaypita-patsami paycuna Tayta Diosnintsi munashgannog cawarcaycan. Tsaymi paycunaga waugui-panicunata imachöpis yanaparaycan. ¹⁶ Paycunanog cagcunataga pitapis cäsucäriy.

¹⁷ Estéfanas, Fortunato y Acaico gamcuna cagpita watucamag chaycamuptin pasaypami cushicushcä.

¹⁸ Gamcunata shacyätsishushgayqui-

nogلامي nogacunatapis paycuna shacyätsimashga cushishgala Jesucristupa wilacuyñinta wilacunäpag. Paycunata shumag respitanqui.

¹⁹ Cay Asia provinciacho caycag waugui-panicunapis gamcunapag salüdunta apatsicamunmi. Tsaynogpis Aquila y Priscila y wayinog juntag waugui-panicunapis gamcunapag salüdunta apatsicamunmi. ²⁰ Tsaynogla chasquicäriy lapan waugui-panicunapa salüdunta. Gamcunapis shumag wamayänacushpayqui saludanacäriy.

²¹ Cay cartata dictashgänog juc escribipämashga captinpis ushanantaga quiquëmi escribimö.

²² Pipis Jesucristuta mana cuyag cäga infiernuman gaycushgami canga. ¡Señor Jesucristo cutimunanpagnami caycan!

²³ Señornintsi Jesucristo yanapayculäshunqui imaypis ali cawapäcunayquipag. ²⁴ Jesucristuman yäracog mayë captiquimi lapayquipag salüdöta apatsicamö. [Amén.]